

雪橋詩話初集



雪橋詩話卷第六

遼陽楊鍾毅撰集

吳興劉承幹參校

慎靖郡王嘗屬彭廷梅輯據經樓詩選十四卷多高澗  
之音王自序云矯其性者損而除之正氣勃勃從紙上  
出豪無乖氣相戾自著有花閒堂詩鈔一卷紫瓊巖詩  
鈔三卷續刻一卷先是嘗得端谿研石鐫之曰紫瓊巖  
李鐵君嘗爲作賦旣自號紫瓊道人遂以名集花閒堂  
者所居西園十二景之一其題翁照春篷聽雨圖云一  
夜春濤打船尾雨聲破夢催人起推篷曉失四山青柔

櫓搖搖水雲裏借問扁舟何處歸去來長在釣魚磯幽  
人事業渾如許臥看江天白鷺飛又題畫四首松皮屋  
子枕谿頭燕尾春波碧玉流一片輕雲作微雨隨風流  
出下灘舟林邊一徑傍巖隈水閣風亭掩映開應是此  
中無暑到瀑泉高自半天來古樹連蟠帶石坡夕陽山  
靄兩相和老僧拄杖蹋黃葉秋在白雲深處多玉水瑤  
山一抹同六飛飄墜晚煙空地鑪茶鼎幽人屋夜半窗  
閒宿火紅王善琴又善繪事嘗爲汪蒼巖作秋山平遠  
圖禮恭親王題詩甘道淵稱爲雙絕

京師廟市向惟慈仁寺土地廟藥王廟數處直郡王建

報恩寺興不數年王禁錮卽止康熙六十一年敕修故  
崇國寺成賜名護國寺每月逢七八日亦如慈仁諸市  
重建隆福寺每月逢九十日市集今稱之爲東西廟貿  
易甚盛周元木有隆福寺觀市百韻詩慈仁市則無人  
矣若古夫于亭雜錄慈仁書攤故事久已絕響土地廟  
市每月逢三日藥王廟市以朔望亦不盛惟琉璃廠火  
神廟正月上旬猶有書市及賣薰煙零玉者西便門外  
一里許白雲觀卽元長春宮舊址至元甲申三月長春  
真人邱處機自雪山回燕明年五月特改太極宮爲長  
春宮居之羽化於此每歲正月十九日四方黃冠駢集

游人甚盛相傳爲遇仙蓋其誕辰也呼爲燕九節錢籜  
石白雲觀詩豈爲南宗別重尋太極墟先生蓑好在止  
殺語何如柏子微風際桃花細雨餘十年登閣意祇益  
鬢毛疏王蘭泉琴畫樓詞憶舊游歎青牛路杳白鶴煙  
消難問全真琳宇西華近望蒼松翠柏交映檐楹金籠  
尙留香火鐘磬傍霓旌說落鐙風後時傳灌頂士女傾  
城生平自蓬島向終南太華訪道瑤清更歷龍沙遠便  
安車回日名著燕京玉田舊闕樂笑翁游此有詞誰記好取叶  
鸞笙喜仙侶同來暮春芳草雨正晴光緒閒有高道士  
者頗通聲氣西園諧價多以白雲觀爲初枕焉

沈椒園恆月山墓誌銘乾隆十二年五月十三日有蒼頭奴白衣冠奉書冊踵門叩余曰小人宗室某僕也主於是月十一日亡矣遺令以詩集呈公剛定且乞志墓語畢泣余聞之驚亦泣良久乃啟其書旣歎生年之不永而其人其文不可無述以傳也生名恆仁字育萬又字月山系出

高皇帝父普照素工詩封八分公官宗人府宗人西安將軍以積有勳勞生齟齬襲公爵後不應封坐廢益溥志於學而朝廷方設學教宗人子弟生慕之具狀宗人府以戊午三月來學時孫府丞灝與余同官翰林董學

中事見生恂恂儒者皆愛之及讀其所爲詩余尤器焉  
無何以嘗受封故例不得留學蓋在學僅四十五日云  
然家居學益勤時時就余論詩及余罷官閒居生請業  
益數余令以詩呈家侍郎德潛侍郎亦亟賞之且歎嗜  
學之勤時髦無與匹今年四月中生來請刪定其詩余  
諾之臨去依依其容若有不釋然者別二十餘日竟死  
年僅三十五悲哉去秋

天子幸瀛臺生擬侍宴詩聖世雅音遠近傳寫焉

國朝宗潢人文邁往代自紅蘭貝子岳端首倡風雅問  
亭將軍博爾都紫幢居士文昭曉亭侍郎塞爾赫後先



迭起遠追漢河閒東平之盛而生獨慕紫幢之爲人紫  
幢從王尙書士禎游辭爵讀書爲士林所重查編修慎  
行以宗室高人序其集雍正中卒余哭於臺谿第中及  
得生如見紫幢焉而今已矣雖然生之詩清微樸老克  
具古人風格其足傳於後無疑也其詩集四卷爲乾隆  
丙午其子宜興所編多蕭散恬適之作右安門外卽目  
云澄潭初月影微微雨過涼生透葛衣十里亂蟬風兩  
岸藕花香送釣船歸春陰云香車寶馬滿春城盡道游  
春未放晴我愛養花天氣好密雲微雨近清明

樗仙將軍書誠字實之一字季和又字子玉所居石虎

胡同曰灌讀草堂汲井種菜別業曰小江南去南郭十里地名沙龍嘗有句云瓜擅沙龍美蔬加石虎奇又云放鶴終當謀一艇聽鶯聊且據雙柑嘗以秋日攜家游小江南作歌云途中爭問小江南行到屋窄如僧龕飯餘隊隊尋花去獨契藜牀盡日酣有靜虛堂集善畫梅寫梅偶題云梅仙藏名會稽中直入禹廟騎梅龍僧繇丹粉汗爪角鑑湖夜浴雷雲紅濤翻敗甲凝鮮彩流散人間作梅海四明狂客醉不聞孤山處士橫舟待東風吹雪乾坤香放吟得意雙鶴翔高人不與天下事月煙百里圍蒼茫誰知更有花光老亂墨點窗世爭寶弟子

欺人寫紙條未知真景如何好自製竹葉酒名頤志春  
又有瀟湘春嵩山將軍永憲以菊葉製酒名彭澤春均  
見靜虛堂詩集自注

嵩山康修親王崇安子其手製橘酒惠敬亭敬亭見酬  
以詩賦答云記得秋林橘柚黃槽牀手釀碧雲漿澆書  
應許回中聖蠲渴還將慰老羌半楹晴涵雲夢月一尊  
香帶洞庭霜五湖多少煙波興欲共萼羹一味涼與檇  
仙驪仙均隱於酒驪仙名永忠多羅恭勤貝勒宏明子  
號併欄道人嵩山同檇仙雅集驪仙以足疾不得往戲  
呈云臨風也自思元度罵座應憐少灌夫詩曰延芬室

集

敬亭名敦誠別號松堂英王裔有四松堂集詩二卷文  
二卷鷓鴣菴筆塵一卷紀文達爲之序哲昆懋齋爲作  
小傳錢南園詩王孫好客同青眼祖席吟詩半黑頭將  
赴湖南留飲四松草堂作也乾隆辛丑新葺數椽命名  
葛巾居招客賦詩以冬十二月歲辛丑分韻驪仙得丑  
字詩云先生矍折腰無夢到芻狗參軍偶一爲歸隱十  
年久四松餘三株一谿遶萬柳簣山縱復橫縷井塞且  
瀏彌望高旻同蒼翠當窗牖身世已浮雲家計付哲婦  
閑居心太平獨對一尊酒酒酣恣嘯歌偉氣尙衝斗緬

維元亮達巾漉仍覆首今秋檢草堂旁舍置壚缶樹杪  
青旆懸滌器雜童耆客至邀盡歡甯計四十九耳熱任  
彈冠畏冷從炙手先生但一笑不自辨妍醜我與先生  
游弟兄兼師友久要平生言相期無腹負省事此默坐  
好飲果佳否憂來天海闊醉去烏何有筆墨束筍如淹  
閣伍敝帚差不忘廢書健忘某至某剝啄童致詞有約  
爽吾口鐙紅梅白閒大字煩運肘分韻得東坡歲月皆  
辛丑我詩恐不如畫壁看蛇走所居有宜閒館拙鵲亭  
嘗作拙鵲亭記

月山詩兄弟齊名似陸雲行年總角學能勤謂懋齋敬

亭也懋齋名敦敏字子明其贈曹雪芹云尋詩人去留  
僧壁賣畫錢來付酒家春日雜興云不辭種菜身兼僕  
無力延師自課孫有槐園在太平湖側敬亭東皋同子  
明兄作云下樓帶酒呼漁艇解纜推篷出葦塘薄暮一  
篙煙水闊醉中已過小南莊夜涼無寐近秋天蛙鼓村  
桴落枕前恰似彭城飄泊客逍遙堂裏對牀眠

敬亭爲理事官瑚八次子出繼叔祖經照已故子甯仁  
爲嗣經照字定齋普照胞弟月山自謂學業得力於叔  
經公爲多經公王子奪爵後以期招族中子姓於家園  
飲酒賦詩月山未嘗不從或春秋佳日聯轡游近郊得

句欣然相賞人目爲兩書生不知俱故公也其上定齋  
叔父集太白句云我家僊翁愛清真青蓮居士謫仙人  
吟詩作賦北窗裏平生不解謀此身寶書玉劍挂高閣  
斗酒十千恣歡譁一醉累月輕王侯興酣落筆搖五嶽  
手持綠王杖身披翠雲裘時時出向城西曲一生好入  
名山游登高望遠形神開碧峰巉巖綠水迴清風明月  
不用一錢買拂花弄琴坐青苔心愛名山游閒騎駿馬  
獵羈金絡月照皇都流星白羽腰閒插雙鷓迸落連飛  
鶻弓彎滿月不虛發白酒初熟山中歸香風吹人花亂  
飛餐霞樓上動仙樂美人更唱舞羅衣舞羅衣揚輕歌

金樽綠酒生微波百年三萬六千日歲歲年年柰樂何  
四松堂集謂祖經公有絲竹之癖此詩蓋紀實也

華泉在華不注下邊華泉墓直其南數里淄川張榆邨  
解元元詩云歷下稱詩宿尙書沈杜儔敦盤分北地宗  
派啟東州墓道風煙斷華泉蘆荻秋遺文傳海岱永賴  
砥橫流漁洋題華泉詩稟後云轅里後學王某書於慈  
仁寺其論詩絕句未及尙書有邊習猶傳林雨忽沾衣  
覃谿謂仲子手稿野風欲落帽疏雨忽沾衣實是疏字  
華泉詩翰卷有印曰七十二泉深處覃谿題云裘馬何  
因例少年司徒詩自太常編石門霜露莓苔句可似谿



光碧玉泉短章杜注孰津涯四傑風流各一家莫道李  
何同派別摩挲小印似長沙睡足編開又六秋疏髯影  
憶拜書樓篋中轅里裴衷意猶想雙松對唱酬此詩作  
於丁巳壬子冬於濟南曾題華泉遺像也其辛亥題漁  
洋手評邊仲子詩草四首之二云今雨瑤華孰比倫山  
齋睡足是天眞老翁七十拈毫禿不愧尙書邴下人濟  
南司寇接司農神韻誰尋格調蹤只有沾衣疏兩句依  
然離華對青峰

張詰士員外四科臨潼貢生僑寓維揚有寶閑集及響  
山詞與樓于湘馬佩兮秋玉閔蓮峰陳竹町厲太鴻余

研南吳章五多所唱和秦川公子筑缶歌呼端居多暇  
時有鄉關之思其臺城路潼關驛樓題壁云盤迴峻坂  
凌空上參差漸分關樹浩浩河聲濛濛嶽色閑引行人  
來去寒雞唱午向小驛荒涼小樓延伫短髮狂搔眼明  
初識故園路沈吟殘照未久早風陵埽畔歸客爭渡形  
勝依然英雄安在幾度銷沈今古闌干漫撫盼犯斗仙  
人茹松毛女凍月蒼蒼玉蓮花半吐妖靄書來爲卜居  
於藍田之桃花川上更買水田四十畝爲歸老計賦買  
陂塘寄之云雁來時爲營將老菟裘人外初築萍游尙  
戀江南岸夢去幾宵相續雙鬢禿待自把一犁春雨餘

生足何時野服對藍水。燒山煮芹，剝栗伴我草堂宿。柴  
門外，十雙占斷平綠。煖煙耕罷，生玉商顏，朝口過從近。  
醉裏吹簫騎鹿歸。計熟更寄語，明年早買雙黃犢。相逢  
可卜儻古雪。消時落花流出，引權入谿曲。百字令自述  
云頭顱如許，算未倦慵飛。吾慙高鳥，未肯微辭。饒宋玉  
昨夢荒唐，堪笑隴樹秦雲。吳頭楚尾，兩地關懷，抱攤書  
簾閣。愁兼落葉還埽。誰遣藥樹羸妻飯，籬驕子。尙記吟  
情攬。催遞詩筒微酒。社落落，幾人同調。淡月吹笙，輕寒  
命酌。甘對梅花老。春游前度，據鞍猶是，年少壬申除夕  
前二日。柴木軒雪後擁爐，忽憶去歲南還。正以是日抵

舍老將至矣歸計未成能無慙然賦甘州寄西州親故  
云記麻衣掩雪別西州歲晚役車休又林亭積素香篝  
盡冷試數前游幾度天風鶴背華髮漸驚秋鎗火青熒  
畔歸夢悠悠誰探草堂梅信折一枝相寄楚尾吳頭料  
流銀哀壑閑了夜回舟鎮天涯殘年兒女熱松明絮語  
伴淹留空懷想墓田春雨行叱烏牛

雍正六年因滿洲蒙古兵駐防杭州者不習水操命將  
軍鄂彌達總督李衛會議遂分營於乍浦習之右翼滿  
洲副都統移駐仍屬杭州將軍兼轄甲兵千六百名戰  
船十八隻營房三千二百間築城時欲方其地令居民

遷徙惟十家營以陸孝子宅得不毀獨缺其一角云舒

雲亭以乾隆十九年署乍浦理事同知其雨中望九峰

云涼陰冑斷岸曉色迷孤鴻倚樓望九山海氣連遙峰

颯沓雨不止蒼茫秋幾重題詩憶潛夫

李確  
里人

飄然希高

蹤乍浦舟次云登高餘興在重泊泛湖船黃菊已明日

西風又一年寒雲迷古堞折葦亂秋煙向晚橫塘水菱

歌幾處傳嘉慶十九年里人重修城隍廟副都統西淩

阿有碑記武康徐雪廬熊飛寒夜與西純齋都統話乍

浦舊事感賦將軍籌海夜頻興兵衛森嚴士氣騰往日

蟲沙紛出沒前朝壁壘倏憑陵戈船出哨寒吹角戰馬

迎城曉蹋冰咫尺明州同設險戍樓相望見殘鐙嚴城  
旦夕擁刀弓出汎重洋羽檄通干斛樓船斜照外七星  
鐙火翠微中投誠莫信劉香老始禍應誅沈保童獨樹  
營荒憂不細羣倭曾此蔓江東

雲亭他塔喇氏己未進士歷宰桐鄉平湖山陰海鹽所  
游歷若歿山爛谿禹陵秦駐皆佳山水案牘詩筒旁午  
迭進尤薦于友朋之誼嘗爲顧行之珽周穆門京施竹  
田安刻集竹田序其蘭藻堂詩云鄭都官之于孫路不  
聞月割俸錢沈廉訪之于吾衍未嘗代鏤詩版辭映李  
及之于逋老亦尠詩本是正乃君謬賞弇鄙之辭既爲

謀諸剗劂而藥裏之貽廩人之繼憫予病且困者八年  
如一日至于琴歌酒坐閒有倡和一字未安互相商榷  
是眷予之深者莫如君而稔君詩境之甘苦者宜莫若  
予也杭大宗嶺南集春日懷吟社諸公卻寄八首之一  
爲政風流又幾年陳留書記更翩翩租船記送胡奴米  
買宅曾賒邱伯錢菌閣雪深翻墨海印牀春霽繞茶煙  
月翁辛老紛遺稿次第煩君棗木鐫焚虛大師主淨慈  
習詩畫雲亭與結支許之契茶筍湖山時偕游讌以微  
疾引歸歿後無子大宗傷逝詩云淒絕車橋路山猶繞  
郭青詩篇清氣守門巷綠陰局有夢尋禪窟無兒乞墓

銘秋風兩行淚霑灑爲忘形

奉天陳深字子淵號壑淙其先以戍防京口因家焉性  
簡默寡酬酢弱冠能詩其尊人或菴舊與馮文肅善文  
肅寄或菴詩云因憐吾黨意憶共阿戎談又懷人絕句  
云名流到處自驚座廉士有時還灌園獨把一編春雨  
外落花如雪不開門

東鄂珠亮都統齊什子其高祖溫順公和理原係東  
鄂部長

太祖納妃哈達身率甲士衛行遂以所部來歸與費英  
東額亦都扈爾漢安費揚古爲五大臣尙端莊長公主



入參帷幄出總軍旅征扎庫塔取烏拉佐命之功爲多  
珠亮字韜明號澹翁承襲二等男賦性高簡年終二十  
八有冷月山堂詩一卷夫人宗室嘎公女有養易齋詩  
一卷長子嵩山字伯仁有餘廉堂詩八卷自序稱五十  
餘年身經殘廢於閒佚之中每逢煙水雲山則不無興  
感實非有意爲詩其弟峒山字仲仁有柏翠山房詩一  
卷伯仁夫人慎貝勒圖公女孫亦工詩有蘭軒詩一卷  
其子能泰合而刻之家世勳戚一門詞賦亦足稱也仲  
仁閒興云谿行無伴侶藜杖日扶余一二里芳徑兩三  
灣碧渠拈花招舞蝶投葉賺游魚醉向峰巒坐閒雲對

卷舒詩格極爲閒澹

禮恭親王有答懷安教諭吳大展詩大展名久成號崑崖其媒者言效香山體云媒者聚而言互述適貴府一云攜雙鬟眉痕纖月嫵綽約步風前神作梨花舞主人曰不佳面宜團而撫其一坐長歎吾事亦中阻有女善箏琵琶眇清音吐主意在廚孃妙伎視如土一人大笑言傾聽吾語汝媿妍亦何常巧拙隨所取章甫空適越好竽瑟休鼓揣勢合其情居奇稱善賈谷嗟復有人汝言未全舉同車定相應求偶翻失伍人事我爲媒天命彼實主不見感遇人寥落竟終古劉峻辨命論之旨也

悟菴農部卓奇圖題德芝麓畫扇詩云野水平沙落日  
遙半山紅樹影蕭條酒樓人倚孤尊坐看我騎驢過板  
橋河閒紀氏稱之謂其風味翛然有塵外之致其五言  
如避風朝隱几看雪夜開門孤游嘗竟日一醉輒經年  
晚樹連雲暗春山帶雪高含懷辭故侶帶醉入他鄉絕  
句如迴嶺抱孤邨居人半媼姬幾家小兒女共戲垂楊  
下七言如吏有餘閒殊勝隱貧無多累未爲窮善感因  
成今日病耽詩合受再生窮人當老至風情滅天入秋  
深雨意多亦皆清新超雋情韻斐然嘗輯白山詩存惜  
未卒業

雍正庚戌設立軍機處惺齋都統明善與覺羅蔚文尙  
書同以中書充章京惺齋字元復葉赫納刺氏官至西  
安副都統夜行塔布欽搭拉云一圍殘雪人煙白四顧  
平沙夜色黃行土勒根郭爾云穹廬空羨駝峰美土竈  
惟求馬糞乾歸途有感云往來風雪羊充饌經涉江河  
馬當舟皆出關宣命時作熙朝雅頌集謂其官中允誤  
矣

大園上人句云雨深苔到榻糧欠鶴辭籠徐廷槐笠山  
句云麥熟僮催餅蠶眠婦守鋌張遠覽偉瞻句云催兒  
樹雞柵看婦補牛衣永嘉徐趙之徒也

拙菴老人明泰有自我集漫成云芳草依依沒舊痕望  
中新柳識前邨餘寒任在東風裏燕子來時不閉門

索綽絡文恭公觀保石東邨子題宋徽宗畫鸚鵡云艮  
岳工成殿宇涼珠簾深護海南香閒情卻試珊瑚筆解  
語還勝翡翠妝毛羽至今猶鄭重衣冠當日太倉黃可  
憐家法惟書畫南渡多有壽皇其和御製有山骨瘦  
於僧句一時傳誦與從弟文莊公德保並以乾隆丁巳  
進士入翰林又均倬直南齋屢典貢舉阿文勤五使高  
麗圖文恭有題詩煦齋協揆爲文莊公子見之以爲家  
寶遂書一冊易之煦齋於嘉慶己未以內閣學士往朝

鮮頒詔故程春海侍郎詩云文勤數使西蓋馬欲揜對  
盧作羣雅文恭題句明珠編我師讀之喜欲顛況師龍  
節履咸鏡玉貌宮袍發高詠乞詩乞札徧東國後月前  
潮兩輝映文恭手澤欣弓還我師寶翰增舊觀誰歟彙  
作鳳墅帖副墨海上兼名山章佳立庭丈鄂禮爲文勤  
七世孫余曩以秋賦主其家曾出此圖相示

楊清端公宗仁其先沂水人徙遼陽州祖必登順治乙  
酉舉人父朝正以侍衛改兵部督捕司員外郎歷東昌  
府知府清端其長子也由慈利知縣累官湖廣總督弟  
宗義河南巡撫子文乾字元統號霖宰由永定河官知

曹州累官廣東巡撫孫應瑤應琚字松門由河東  
西甯道累官雲貴總督有據鞍錄一卷乾隆己未由西  
甯入都紀行之作也其記過關山至隴州出州南門二  
里過汧河行數里有奇峰如掌高指碧空乃吳嶽也杜  
詩昨憶踰隴坂高秋視吳嶽東笑蓮花卑北知崆峒薄  
可以信茲山之崒嶽矣境內有魚龍川中有五色魚少  
陵秦州雜詩遲迴度隴怯浩蕩及關愁水落魚龍夜山  
空鳥鼠秋古人一字必有本如此其記秦築長城始於  
臨洮謂蒙恬阿意興功兄弟卒不免乃緬甸之役嗜功  
肇釁亦不克以功名終是可慨也

武進楊氏世踐清華農先學士椿爲明靜山修撰廷鑑  
孫芝田諭德大鶴第三子生平無它嗜好惟以經術史  
才爲文章自娛西溟竹垞穆堂望谿皆相歎賞與弟楫  
先後在詞館兼明史綱目及一統志國史三館纂修勤  
職冠同列尤貫弗有明一代事論者比之鄞縣萬季野  
子企山侍讀述曾稟家學精於史傳博而知要與從兄  
三吾並舉大科乾隆壬戌一甲二名進士己卯充通鑑  
輯覽纂修官發凡起例斷斷討論在事入載與書始終  
牆牖屏幃悉著紙筆詩亦清綺其浮山禹廟觀壁閒山  
海經埭像詩云眞宰三靈萃鴻鈞萬彙陶神姦原並育



山海競潛韜緬昔平成烈時先泆洞遭八荒勤偶步四  
載奠林皋蒼玉開函授元圭錫命叨鑄金窮變怪象物  
晰秋毫魑魅窺形屏龍蛇匿彩逃洛符同寶貴泗鼎忽  
淪滔斷簡存劉略遺文問楚騷尸藏相顧械烏飼畢方  
號精驗如符契疑言尙剖刀何年圖鬼祕入廟肅清高  
靈石當階峙奇功一簣勞岷峨聯脈絡淮海帖波濤浮  
似來孤鶩移甯接六鼇中央森殿陛百物備牲牢恍惚  
陰雲合睚眦怒氣豪麟身兼虎齒魚負亦蛇操飛有驩  
頭翼鬣生役采毛燭陰曾不息相柳尙餘臊夸父奔林  
渴刑天舞戚遨森羅爭顯相環列儼分曹過日名雖記

臨風首重搔江河當四會樓櫓集千艘簫鼓喧祠禱魚  
鹽雜市囂古松崇廟貌美黻換神袍搏土勞丹臆驅巫  
迓赤絛人天同詭誕士女混譏褒平野鱗分次殘陽弓  
半弋茫茫橫百感歸路響寒颺妥帖排昇可與竹垞禹  
陵長律相方

乾隆初國雲浦與國笠民同名國棟雲浦擢廬鳳道時  
廷臣以吏部同名二人請

高宗親指出與韓翊事略同後笠民奉敕更名國梁笠  
民字丹中那拉氏丁巳庶常改官吏部歷階宮庶充日  
講起居注官外授郡丞擢守昭潭遷貴州糧驛道生平

宦迹所至踰皋蘭涉秦州西極烏魯木齊歷百越汎泮  
荆皆地當邊徼有澄悅堂集十四卷孫玉麟視學皖江  
刻於太平節署其南明集頤醕園十二詠如頤醕堂妙  
香室玉犀舍清華閣小天池人鑑亭碧鮮臺清尊館青  
霞塢各系以詩亦徼之誇州宅之意也水驛山郵駢駢  
行役見聞所及寄於歌詠者尤富泊馬螳灘云舟底水  
將石作骨江邊山以樹爲毛一篙危壓千峰迴兩壁青  
圍萬木高習坎幸無妨嘯詠稱名雅不入風騷傍村擊  
纜衝波定坐看流螢點素袍山行之揚老云蚤驚邨犬  
吠茅茨送月西沈日上遲風洞陰風愁颺颺

風洞在清  
平南四十

里

石關怪石伏蛟螭

石關在場老北三十里

天晴粒飽天生米地

暖香生地骨皮擬趁秋陽換春服牂牁多屬恐非宜集  
中律詩閒有兩韻通用者考之杜詩如奉贈鮮于京兆  
崔氏東山草堂二首皆真文通押常建閒居則庚與侵  
通章孝標駱谷則青與侵通李長吉始爲奉禮憶昌谷  
山居則真文元通東坡汲江煎茶亦庚青並用元人律  
詩通韻者尤多不足爲笠民病也

國雲浦博爾濟吉特氏官至安徽布政使有時齋偶存  
詩鈔子秋潭相國文孚所刻李雨村稱其關心花有恨  
革面鏡無情及京口晚眺飛雲排鐵甕怪石控銀濤之

句予謂不如立春前三日雪云雪猶當臘得春已破寒  
歸爲近自然兄天峰總兵國柱亦能詩伊犁云萬里窮  
荒地孤城瀚海閒舉頭惟見日過此更無關朔氣橫伊  
水陰風帶雪山犁庭邊事定壯士唱刀鐙駐劄小陽河  
匝爾作云望月有懷慙豹弁綴衣無線績駢毛哈拉玉  
嚙袞偶成云野鳥亦知愁落日河冰漸可任行人伊爾  
哈里克遣興云情因有我還成感事到無心始見功皆  
在西陲時作白鶴亭送國天柱西征詩云世家英略舊  
知聞年少乘時好建勳偏壤未歸周版籍渡瀘重見漢  
將軍荒原入夜嘶羌馬大旆臨風掩瘴雲尊酒都門好

相待春來談笑解征衣

章佳文成公阿桂平定西域金川廓爾喀三次圖象紫光閣御題有云楚材旣出爲國之楨梁文定公因書卽律文正王傳相贈其伊犁軍營詩云欲埽妖氛淨巖疆戰不休人猶爭馬革天已厭旄頭刁斗三更月關山萬里愁渠魁何日滅非直爲封侯大軍次永昌作云王師毋盡殺脅從帶餘生一將功何有三軍怒未平投戈收戰骨撤幕返春耕仰喜皇心慰邊陲已息兵其贈錢沖齋詩云話舊成塵影籌邊驗淚痕霜鬢論兵固猶有意不自慊者矣公家山莊在盤山北馮文肅村舍在盤山

南與談山居之趣有驢背游山之語公曰乘牛之妙遠  
過策蹇文肅詩云朝衣點露徹晨班黃閣談清一解顏  
可但諸侯稱極地幾曾太傅忘東山讀書力定千軍靡  
報國心酬百念閒只隔田盤峰數點買牛應許共躋攀  
嘉慶丁巳八月屆公八旬成哲親王書功高心轉小勞  
久質彌堅十字爲壽大爲喜賞幾欲逢人道之其所書  
樂志論立庭丈嘗以拓本見貽今已成敷錫堂之劫灰  
高芸功孝廉書勳文良公季子有石堂詩鈔二卷張樊  
川祭酒序稱其壯年抱疾不良於行日守一編詩清婉  
一洗豪貴之習送別二姪石生云老來兄弟感凋零頭

白寒氊一片青幸有超宗能振翮乍逢王濟喜談經春  
花半落呼猿洞秋雨初晴放鶴亭水宿吳兒歌四起丁  
山西畔與誰聽

李眉山謝查承齋饋新茗作才品稱雙絕而能愛此身  
大江秋量闊尺玉碧華新一意存幽澤多君避要津寒  
泉餘正味早作寄茶人承齋名查克殫一字樹亭松莊  
相國查郎阿子大蓋從子乾隆辛酉舉人官知縣博西  
齋送宋泗城棊洲之任并查承齋回太平云南天相見  
慰相思愁絕停杯話別時雲漢迢迢查客遠秋風蕭瑟  
楚人悲如蘭恰有香生座飲醴真同酒在杯明日天涯



原咫尺平生心跡重爲期嘗跋雷谿草堂詩曰予初未嘗爲詩從伯父大益先生游聞其餘論先生論詩以性情爲主一切鬥花儷葉蛙綠皴紅之習悉舉而空之故其詩杼柚予懷天倪鼓舞五十年來蕭寂窮愁之日朋游燕賞之辰研篋筆牀未嘗離手其自作如奉陪履安舅氏游香山逢牧亭歸詠紀事五古亦頗沖寂自研大益句云分明一種閒花草費盡東風日夜心爲承齋題南田畫冊作也

楊西英大令師震以舉人宰青浦有敬齋吟稿其奉賢詩云熬波入市朝攜雪篝火鳴機夜紡紗同滑耿二明

府游石湖云沽酒市稀游屐少賣魚人集釣船多

傅襄勤顯字令宜以辛酉繙譯舉人官中書隨征金川  
出守岳州累官漕督其臥雲堂詩稿刻於乾隆辛巳梁  
文定爲之序邯鄲道中云臥客初醒處才人已嫁時雁  
聲云似爾何心商去住爲誰無計耐炎涼吐屬致爲婉  
約

武威王化南字蔭棠乾隆己未庶常散館授知縣游陞  
平度州知州期年引疾去州民餞以詩曰君爲百姓來  
百姓送公去渠水如許清看公走馬處久之起爲莒州  
資望當遷上官有欲因之取賄者艷然曰吾豈以財求

官者哉卽日辭歸述懷詩有云羞聞白兔營三窟每對  
黃金懷四知

博虛有府尹序顧邦英雲川詩稿云洛者爲宰政簡刑  
清公餘焚香握管無異爲諸生時襟懷高朗諸體詩俱  
登古人之堂而七律尤追蹤唐之初盛洛耆乾隆甲子  
舉人官懷柔知縣嘗自選其詩及汪松甘運源王麟書  
甘運瀚之詩爲海沱集刻於乾隆十七年有陳士璠李  
錯喻世欽序其寄李眉山先生云采采芙蓉花寂寂秋  
江晚望望故人居渺渺秋天遠一片鴈峰雲三年長在  
眼豈獨山色佳幽人所游衍孤蹤隔風煙何由共繢綵

願託遙天鴻因之達誠款寄三弟傑云鼇峰春色遠龍  
塞白雲長風雨人千里關山淚數行親知多偃蹇身世  
各蒼茫原上鵲鴿語飛飛黯自傷天壽山云十三峰勢  
望中分賸水殘山倚夕曛古道秋燐飛碧草荒陵石馬  
臥寒雲黃巾作難終亡漢白馬遺封尙祀殷惆悵百年  
無故老憑誰指點說遺聞寄哈達夫云年來朋輩獨憐  
君慷慨悲歌自不羣萬里金城吟塞月十年青海臥寒  
雲邊關烽淨閒長劍華岳秋高醉夕曛今日風塵還偃  
蹇數奇不獨李將軍

黃文蓮過王存素寓齋有贈云竹梧小徑啟雲關酒伴

詩朋共往還結社幾年依北郭捲簾終日對西山松陰  
滿院閒調鶴月色經秋好放鷗便擬滄洲共乘興看君  
潑墨寫孱顏陸朗夫亦有訪王存素於所居西園詩存  
素名慄太倉諸生煙客璽卿曾孫麓臺侍郎從子畫筆  
蒼秀兼善填詞其清平樂二首云海棠鋪徑人向雕闌  
凭映月酒容紅玉潤笑看春風吹鬢更深碧瓦煙昏垂  
簾花影移痕貪把玉琴頻理繡衾香冷重溫雨濛煙暝  
又是清明近零落杏花渾欲盡時節綠窗人靜含情獨  
上西樓珠簾半捲銀鉤縱有千絲楊柳能藏幾許春愁  
嘗言婁水百餘年詞學鹿樵生體綜北宋末極幽妍至

小山漢舒今培罔懷素威穎山乃能上繼浙西六子同  
時作者武林則樊榭授衣廣陵則漁川橙里陽羨則澹  
成及位存兄弟樵李則南薊春橋穀原吳中則企晉湘  
雲策時升之共二十餘家各擅其工卽南宋未有其盛  
也一時以爲快論後來填詞家自皋文保緒出而陳義  
較高順卿杏舫出而斟律益細自足突過前賢至於纏  
繚婉麗風美動人處亦初未有以相勝耳

宜輿史位存承謙與弟衍存承豫並擅詩名寓金陵蔡  
氏水亭句云三秋絲雨侵孤館一樹垂楊見六朝爲汪  
楓南所稱賞尤精倚聲之學杜雲川嘗推爲一代作手

有小眠齋詞四卷桃花夫人廟一萼紅云楚江邊舊苔  
痕玉座靈跡是何年香冷虛壇塵生寶曆千秋難釋煩  
冤指芳叢飄殘紅淚爲一生顏色誤嬋娟恩怨前期興  
亡閒夢回首淒然似此傷心能幾嘆詩人一例輕薄流  
傳雨颯雲昏無言有恨凭闌罷鼓神弦更休題章臺何  
處伴湘波花木暗啼鴉悵悵明璫翠羽斷礎荒煙撰有  
靜學齋偶志稱其同縣儲長源詩格矜秀如多情寒夜  
燭有味去年書雪晴春有態山活翠難名春衣乍暖飛  
胡蝶綠酒初香薦蛤蜊固是佳句

周元木與胡雲持在江東詩社中最稱傑出應詞科試

瘡疾彌月未愈手艱於作書多所遺落不得入等其都  
下食冬筍和稚威與稚威原作可稱金舂玉應王申始  
舉京兆年近六十矣長安鐙夕篇有云寂寞東來獻賦  
人藜釭獨對客愁新夢迴憶得江南岸索笑垂垂一樹  
春少喜爲詞特癖陸務觀姜白石秦柳派也

世祖畫牛用指上羅紋印成之見池北偶談承子久禮  
部集城西寺中觀傅雯指墨佛像詩國朝論畫首指墨  
開闢造化從

章皇奎藻赫奕祕天府昭回日月同光芒前朱後瑛盡  
蒼秀師法未變高遼陽雯也奇崛迴出意匠外使指如



筆窮微茫斐字凱亭自號凱頭陀官驍騎校睫巢後集  
畫鷹歌云豈有長風動陰壑白日霜棱慘相薄由來焦  
墨枯燥行碧海蒼鷹眼中落青爪玉立觜金削猛摯誰  
能甘束縛深目如愁西域胡殺機或伏條支雀蓋州傅  
君技精妙且園創始君繼作甲肉迭役腕有神紙上虻  
蜚聲絡索裁成萬象聊斯須三年一葉徒穿鑿黃頽石  
咸凱亭供奉挽歌於凱亭仕履敘述頗詳其辭云閩山  
之陽瀝水出勃鬱川原氣深沕開國捐軀忠毅公傅君  
大節昭星日供奉忠毅三世孫解脫蕭疏世無匹胸羅  
萬象思如泉日麗花封臥縹帙河決酸棗公帑糜直使

驂騑傷一蹶可憐飄泊風塵中四壁家徒貧第一孝標  
代著絕交文才雋天生甯能黜丹青一旦九重知短褐  
麻鞵拜宣室鵝谿十丈寫諸天中禁需人已冇年是日  
前席揮指墨當仁甯讓昔人賢頻伽一抹翔雲端侍臣  
中使盡駭然國清化相坐獅象牙掛長劍青毛卷猙獠  
端麗各盡態精光四射雲旗翻吳貫豈獨見卻步顧陸  
亦應慙在前圖成勅供萬善殿海外來王乞一見誰知  
野鶴不堪羈從來美醞誠堪戀山中供奉自去來芒屨  
短杖蒲葵扇野寺山房畫壁多臥游性與僧齋便王侯  
貴主求尺幅酒酣濡墨驚奔電綺席才張去不留往尋

措大乾魚片水雲蹤跡本無方世人爲妄亦爲狂龍蛇  
牛馬從誰說市肆林泉駐日長杖履年來求不得白雲  
黃鶴空相望昨夜夢君叩我門入門神色何蒼涼示我  
忠毅世家傳指疵文字求相商又云身是比丘尼男身  
再轉成金剛真耶幻耶非思量游魂精氣均茫茫星斜  
月落荒雞歇枕漬衾沾涕泗滂其憫忠寺畫觀世音三  
十二應真像蔣心餘爲賦七古一首

胡雲持寄濰縣令鄭燮云一縣持團扇爭來乞草書風  
流看似此爲政果何如每歎清才少能容傲吏疏十年  
憐鬢髮聞道亦非初燮丙辰進士與牧山太守圖清格

有車笠之好宰朝城時嘗畫石三幅一寄膠州高鳳翰  
西園一寄江南李鱣復堂一寄牧山牧山以草書法寫  
菊花親喪廬墓築丙舍於西山其題畫詩云昨夜西風  
下洞庭猿聲哀怨不堪聽老僧七十頭全白紅日半窗  
猶未醒亦振奇人也法鏡野書事云辛未五月下第歸  
過濰飲友人家濰俗重賈二三賈客與焉語次及板橋  
余亟問曰何如羣賈答曰鄭令文采風流施於有政有  
所不足余曰豈以其詩酒廢事乎曰喜事丙寅丁卯閒  
歲連歉人相食斗粟值錢千百令大興工役修城鑿池  
招徠遠近飢民就食赴工籍邑中大戶開廠煮粥輸飼

之盡封積粟之家責其平糶訟事則右簞子而左富商  
監生以事上謁輒廷見據案大馮駝錢驢有何陳乞此  
豈不足君所乎命阜卒脫其帽足踏之或摔頭黥面驅  
之出余曰令素憐才愛士此何道曰惟不與有錢人面  
作計余笑而言曰賢令此過乃不惡羣賈相視起去

定興王芥子以弱冠入詞林才名甚著由侍講出爲平  
慶道洊歷藩牧自雲南罷職再起修書復授檢討遷司  
業性好朋友與同年邵叔平鄭炳也顧密齋尤善寓書  
往復率以文章道義相劇切言經兼訓詁論道學兼取  
陸王詩文宗魏晉及唐賢晚年謝事自屏居海淀之太

平莊不輒見客託于博奕飲酒憔悴終老有青虛山房  
集自述其生平撰述本自不多又矜慎致功于修詞字  
字句句無敢容易因亦不能多也黛流村新營所住云  
昔年點朝簪本自滄洲吏一辭京雒塵適會田園志卜  
築代巖棲嘉招慙遠至遂賃伯鸞春頗授揚雄字林間  
結架小郊扉晝常閉灌溉發陽翹荒鋤豁蒙翳翦彼惡  
木陰暢此芳菲意非惟娛徂年兼得閑外視支杖聽風  
篁披襟納山翠片雨洗青天寥寥元古思種藥云結廬  
近塵陌獲與田夫齒蒲杏日敷與農候茲焉始余方據  
槁梧素業亦時理荷耒竟不任聊欲勤四體鋤瓜夜雪

餘種菜春陰裏酌以長生瓢注之功德水豈不念朝饑  
好事良自喜擾擾區中緣遂性亦云已

鄞縣袁德達字性三號近齋乾隆六年舉於鄉七年成  
進士授刑部主事庚午京兆試以員外郎與分校遷直  
隸司郎中有趙如勳者定州人父趙和爲其同姓趙簡  
拳而殪趙簡論抵絞越十五年而如勳殺趙宋詣有司  
自言報父仇言趙宋實同趙簡毆殺其父而屬趙簡獨  
承宋得詭免是時如勳年十四弱從兄趙欽錫不平指  
控趙宋以誣告人論徒及長母婁婁言趙宋切齒如勳  
痛入骨母老弟幼自禁耐今母已葬弟能食力矣乃竟

殺宋而詣獄就死有司以故殺論當如勳斬直隸總督  
方觀承以獄上事下司近齋爲仿駁復讐議上之曰該  
督慮是獄情未得尙疑遽質擬非詳刑弼教之本意也  
此案題結久已十五年案內審明無干之人而該犯畜  
謀狙殺口稱執仇其趙宋同毆致死之語僅屬該犯一  
偏之辭出自其已葬之母之口無別證左承審各官曾  
不察覈該總督亦遂依違奏當意謂乃按本律擬斬輕  
重適等奚俟深比不知殺人造意罪在不赦而爲父執  
仇情則可原以不赦之罪備可原之情使將來秋審倖  
邀矜恤暴而逸誅何以懲後且聽其飾詞未覩其眞或



凶狡姦民而與天性激昂奮不顧身之子混相景冒此  
閒誠僞若不明白所關匪細若該犯供詞屬誠則舊案  
何妨改正該犯律有本科應從寬典其或舊案並不差  
謬該犯亦實無它端止因母言痛傷父命銜恨祗金一  
十五載至母亡弟長內顧失戀搯金搵仇束身歸法此  
其處心良可哀憫亦不應與尋常謀殺一例問擬刑本  
教理其貫同條豈宜遷就轉致乖疏此案應令該督再  
行研究確鑿具題到日再議奉旨部駁甚是依議獄再  
上報仇明白如勳得減戍鄭炳也爲作定州趙孝子歌  
紀其事旣而出爲雲南永北府知府永北治金沙江外

萬山中民獠雜處地廡皆不知治貧瘠頑悍無禮教其俗無子子壻不立宗法奴婢之異主者相匹偶各役於主如初不共居室夜則就婦宿生子從父生女從母役屬亦如之父子夫婦莫辨乖離忿怨毒聲流聞至則理諭法禁令曉倫理知羞惡煦煦懇懇境內丕變親教之耕疏墾灌殖如內地又興塾學以開其子弟居二年以禮去官歸作東歸篇其略曰滿目荒荆榛山城一壺繫懸隔金沙外誰復思撫字地僻雜夷獠生猶多猛氣利乖父子恩詬誅況兄弟族亂宗法亡無子子贅壻錮婢罔眾雛生子非伉儷濟濟膠庠英耳不聞六藝吁嗟俗

如此掉首不忍視疲氓似巢禽板屋架巖際二月春雨  
生糲糲雜如娣樂歲一飽難身無完衣衣甫釋行李艱  
又對此凋敝龔黃召杜賢才薄何由繼鬱結摧心胸設  
施慮無自爲之浚故渠宛轉引灌溉爲之營始耕開倉  
給廩餼爲之平舊征銖粒必親涖爲之董塾師訓課依  
傳記時復慮囚餘親指六經義放衙行田間勞勸不辭  
瘁譬彼蠶三眠温厚以爲飼又如病起初藥石忘猛厲  
綢繆二載中稍稍起顛躓嗟哉風木悲北堂凶問至方  
寸旣已摧何能復談治服闋起爲廣西慶遠府知府未  
行卒于京師時乾隆二十五年年四十九其子鈞學于

炳也爲作家傳羅臺山別爲記秦小峴爲撰墓表特爲之要刪以備傳循吏者財擇焉

夢文子侍郎樂府胚胎漢人車遙遙篇云車遙遙遙遙

入煙霧馬不肯停車不肯住解一觸石折軸車輪無聲白

石欲落風吹馬鳴解二遠憶送者此時到家君意已息我

勞如何解三食瓜遇苦食梅遇酸采薇苦飢負薪苦寒解四

陟彼岵嵎我心如荼空林有聲恐非令塗解五道逢游子

將別恩恩出門入門殊與我同解六鰕鮠篇云鰕鮠在泥

不知龍騰微禽入海亦有化身蘭蓀被墀行踐其芳自

居下流於人何傷驂騑伏阜悲鳴向風世無長途與鴛

駘同朝過泰岱羣岡開之我不在高焉知女卑霜淨草  
白秋高天開鷺鳥獨上浮雲下來東出咸陽獨登古原  
落日千里孤懷萬年短兵篇云長戈盪決不如短兵急  
呼親戚不如友生彈我瑤瑟拂彼錦絲音聲雖離我當  
好之我心如環憂不可絕朝興夜眠轉喉卷舌狐狸拜  
月卻略似人彼無其具吾胡以親財溺於淵見者歡喜  
我家固貧爾亦不起奴子盜具行步戰身我原不知虛  
心畏人文子字瑞占號謝山一號午塘又作耦堂西魯  
特氏殿公大司寇憲德第五子殿公由蔭生授理藩院  
主事累遷郎中雍正四年授湖北按察使十月超授巡

撫馬大益以詩賀之有云吉甫能繩武元戎卒嗣功謂  
其祖尙書明安達哩嘗拜安南大將軍爵二等男卒諡  
敏果父化善一等侍衛皆有勳伐也殿公調四川侍郎  
生於成都官舍七歲能習唐人詩黃文襄見而愛之以  
女妻焉十八官翰林乾隆十五年以侍講典廣西鄉試  
擢國子師是年提督河南學政癸酉以閣學偕王芥子  
典江南鄉試王蘭泉司寇出其門下是年視學江蘇甄  
錄單寒爲之延譽如曹來殷嚴東有吳白華趙升之張  
策時咸所識拔以成名者丙子八月以工侍入直樞廷  
參密勿署兵部調戶部二十三年署掌院學士金川之

役部議欲追軍士預給口糧公力止之阿睦爾撒納叛  
自以祖宗勳烈兼資文武常思從軍追討立功萬里外  
而卒以病歿年三十一王蘭泉輓詩所謂夜臺有恨知  
難盡未遂驃姚斬骨都者指是而言自少卽以能詩名  
初有行餘堂詩入詞館有紅梨齋集在吳刪爲夢喜堂  
集重訂爲大谷山堂集六卷嘗謂五言必從悟入而七  
言古詩忽起忽落信手拈來縱橫如意亦非妙悟不能  
白山詩介選其詩較諸家爲多惟缺絕句一體今爲錄  
數首以補之東郡道中雜詠云日暮風吹杜甫臺荒城  
孤嶂夕陽開石門煙澹秋無色潦倒誰傾濁酒杯青山

萬疊迴含愁處處寒沙漲淺流行返界河將北渡溼雲  
草草不成秋征輶鹿鹿復班班一櫂空明荇藻閒日暮  
雲駟更何處晚煙涼露冷魚山孟縣早發洛陽道中雜  
詠云城外韓莊數里遙暮田松柏晚蕭蕭輪蹠卻是恩  
忙甚未泝靈風放小招青疇雨足絕纖塵楊柳輕風似  
暮春樹樹綠陰吹不散亂蟬聲過小平津古瓦長松翬  
曉煙高歌空說中興年金鐙石馬無消息日暮寒林拜  
杜鵑光武陵在孟津曲澗縈迴上北邙斷煙枯木野蒼蒼殘碑  
覆地烏嘯樹一派平沙落照黃紅樓紫殿已邱墟寂歷  
孤城腐草餘風起野棠花滿徑苑牆蕭瑟憶羊車



大盜與殿公同康熙戊午生其賀殿公巡撫湖北詩雄  
飛天育駿雌伏野坰賊自笑行藏拙甯期出處同此用  
裴晉公所云雌甲辰意

音布字聞遠自號雙峰居士鄭板橋稱爲音五哥者也  
工書嗜酒往往不輕與人書其所善雖弗請亦與之以  
故多所不合竟以諸生老板橋爲長歌以哀之詞旨悲  
愴伊兼五侍御於其歿也慨故舊之淪亡亦爲作歌其  
辭曰吾鄉書法雙峰豪藏帖千本如屋高摩挲寢食四  
十載鎔鑄昔喆神囂囂平生愛友兼愛酒酒酣始肯揮  
霜毫筆圓墨潤腕肘活往來如運庖丁刀楷法端莊雜

流麗九華春殿金環搖草書怪變莫方物規矩巧隨風  
雨交雲垂海立露蛟蜃巨石大木趨波濤觀者屏息不  
得語甬道九絕神兵鏖歛然卻立更呼酒紙上餘力猶  
騰跳長安城中貴介子高車大馬行相邀等閒隻字未  
易得笑謂卿輩非吾曹琳宮梵宇偶獨往要尋殘碣窺  
前朝沙彌衲子喜一至爭煎佳茗沽春醪解衣磅礴數  
十紙戲拍僧頂聽空瓢晚游西園號老友葛衣竹杖從  
逍遙西園賓客多雋雅一一心折同下僚相賞獨有板  
橋鄭酒場基墅恆連鑣歌呼爾汝任所適非云名士矜  
高標板橋作字自奇古畫被畫破多吳綃章草篆籀隨

手撥懶同時輩爲推敲喜其雙峰遇都下韓陵片石尊  
瓊瑤戲鴻雲海互傾倒家雞野鷺由詆訕卽今雙峰墓  
木拱荒原冷落迷蓬蒿猶復長歌致深慨淒音激越兼  
風騷寄我一篇寒月夕燭花如豆熒虛察命兒細讀再  
三聽涔涔老淚垂青袍獨鶴無聲斗杓轉百靈下集雲  
旗飄懷人感舊渺何極有酒難向霜空澆嗟乎雙峰已  
矣板橋遠使我白髮空蕭蕭雙峰所書護軍赫騰額神  
道碑予舊有拓本撰文者爲雲樵散騎石芳

彭秋士爲尺木族父其詩如月明終是夜花落不成春  
日將萬景落雲載一峰歸冠閒蟲織網履靜雨生苔松

香餐客飽雲氣壽僧多尺木稱爲脫去麤蕨驂騰古先  
良非溢美汪大紳秋士遺集後敘云秋士在時往來吾  
家嘗與吾友張子崑南楊子石漁沙子斗初相接三子  
皆詩人也又皆窮甚石漁無家晚依崑南爲家嘗刻其  
詩爲家事集斗初家與予近在一僻巷中無長物但有  
破書數百卷手其未刻詩集八卷行吟坐嘯喜樂度日  
復有吾友朱子適庭亦詩人也兼工詞嘗刻其所謂百  
緣詞者三子先秋士卒崑南名岡斗初名維杓皆長洲  
布衣居下津橋崑南有鶴健堂詩鈔秋日過碧公塢院  
云修竹無遠近入門但清風積陰澹斜照暮色蒼然空

苔花細路轉石礧寒流通碧公寂滅久孤塔荒煙中臨  
堂思舊講循林想遺蹤高風昔已渺邱壑今猶同了然  
悟無生趺坐聞殘鐘登堯峰作云夙昔聞堯峰游新歲  
已積杪春羣物秀及茲事清適路轉峰西偏蕭條但松  
石飛泉若風雨淙淙下絕壁向晚猿鳥噉時還見樵客  
緬彼五湖水東逝自古昔煙波碧如此人事幾更易請  
從支遁流空山其禪寂石漁名磊鎮江人寄懷過春山  
云花藥圖書並賞音筆牀茶竈伴微吟最憐小閣聯牀  
語多病常懷出世心斗初隱於商往來江湖閒其耕道  
堂集多行役之作江夜云枯桑出野火凍浦斷行舟歸

舟漫興云一葉輕舟風正穩晚來吹過落帆亭適庭名  
昂長洲國子生有養雲亭詩鈔聽張古樵彈琴云幽居  
晚巷靜日晚生鳴琴傾耳泉流澗當窗風入林樓高寒  
雁過山遠暮雲深再鼓瀟湘曲飄然諧夙心古樵卽崑  
南

錢唐金虞長孺以時文名體物詩如詠帆影云高樓暮  
雨經年別野岸斜陽一片愁柳絮云六代繁華終變滅  
一生飄泊爲清狂亦輕俊可喜弟甦雨叔乾隆壬戌會  
狀直上書房者十七年癸巳以禮部左侍郎致仕主講  
敷文辛丑八十自壽爲長律八十一首隸事該贍不減

少壯朱筇河寄海住先生詩老酣湖色三千頃夢惹臚  
雲四十年

鄞縣陳撰楞山性孤潔詩筆清削尤善繪事有敬通之  
婦客死江都詩曰玉几山房吟卷繡缺集秋吟古蕩歸  
途云日暮東風急歸途雨正繁泥深黏屐重雲溼帶林  
昏野水喧漁艇人來掩竹門遙憐折梅處回首更西村  
句如二分明月樓頭影十里平山檻外雲焚香自寫圖  
中影把卷何須絃上聲均有畫意

王曉蒼方伯占柱有桂舟游草杜鵑亭云未暇空亭尋  
往蹟杜鵑聲裏過雲州與錢穉石過王瓜園絕句一道

柳陰涼似水亂蟬聲裏出東平風韻相似其雄縣句云  
憑誰喚起何承矩爲和當年水蓼花吐屬亦自不凡方  
伯與先高祖侍郎公爲文字交申之以婚媾其子婦爲  
予曾祖姑其曾孫建侯表叔聯豫嘗同官浙中亦好吟  
詠

王含谿起家知縣累官東河總督其古詩云昔之牧牛  
羊必爲求牧芻今之牛羊牧牧芻多自圖井闌絕儲侍  
秋草委平蕪鞭箠不遺力哀哀日夕呼甯忍亡此去羸  
弱與羣俱但冀主人見餘生幸可蘇被水謠云雨霖河  
漲雨不止芄芄黍稷沒泥滓長官蹋勘心惻然曰予爲



汝籌食指三日開倉借無人  
不願借穀願餓死月明星  
稀酣睡足啾啾棲鳥嘯煙霧  
洪水橫流漫土牀驚攜兒  
女泣上樹哀訴河伯暫息  
威千萬莫推此樹仆上天下  
地無乾處二麥纔收失恩遽  
三閭瓦屋數邱田一旦茫  
茫山頂住早知終身忍飢腸  
不如昨日隨水去詞意悱  
惻有元道州之遺風焉朱涵齋  
答含谿內弟喜雪句云  
慰人眼底麩成封此用列子  
聚酒千鍾積麩成封

桂未谷拜圖裕軒先生墓詩序  
先生諱圖鞞布以翰林  
學士告休無子及病棄家入  
延甯菴中門人劉給諫湄  
卽於菴內建祠菴外修墓馥與  
周編修永年同謁距先

生卒已十餘年矣又戒壇謁圖裕軒先生祠坐松下作  
云宗門了徹萬緣空只合叢祠寄梵宮誰是前身誰是  
佛破除煩惱是松風花欄曲曲共誰憑薄宦猶如退院  
僧最喜月斜人靜後對房明滅讀書鐙祠內有賜杖乾  
隆五十年與其兄給事圖薩布偕與千叟宴所賜未谷  
詩所謂一老猶遺杖荒祠卽是家無兒憐伯道起豕得  
侯芭也初仕翰林院筆帖式乾隆戊辰成進士改庶吉  
士辛未授職檢討壬申甲戌兩充會試同考官癸酉典  
試四川庚辰以侍讀典試山左累官侍講學士有枝巢  
詩草第一卷曰從獵集乃其充日講官後歷年扈蹕熱

河及隨園木蘭所作次曰靜居集亦在翰林時作三曰  
于役集則其奉使吉林典試蜀魯及游歷塞外淮徐時  
作四曰歸田集則致仕後所作所居城西南隅曰象坊  
橋于宅之南闢地數畝植桑麻及菘韭曰漫圃出阜城  
門十里而近曰玉河鄉之池水邨隱土山面流築土屋  
數間曰野圃有竹木之勝春秋佳日挈杖獨步往來其  
閒故得詩爲多枝巢者取鷦鷯巢林不過一枝之意因  
以顏其集朱石君謂裕軒不求工於詩顧其胸次素潔  
遇境發抒往往有真意其尤近道而可傳者晚年之作  
高者逼陶韋次者落落卽事言景亦北宋之音劉文正

之言曰圖學士不忽于微不訾于隱儒者之榦也其廉  
靜愴泊出于天性晚屏嗜欲與妻恭人偕修白業參究  
名理有心得脫屣榮利超然去來乙巳秋示疾八月旣  
望移舍于郊舍旁卽所豫營生壙也疾漸篤家人請輿  
歸則曰吾已歸吾宅矣復安歸耶是月晦卒年六十有  
六遺命歿後有弔吾墓者薦寒泉而已勿以葷酒拂吾  
志詩境清真澄澹秋日茱香草堂云草葢危樓土築牆  
秋來景物遶長廊風翻蕎麥花初白露積蒹葭葉半黃  
疏響隔林聞漸瀝炊煙出鳴接微茫柴門深掩無人叩  
獨倚高空納晚涼山行遇雨云黃葉落不盡荒涼蹊徑

微亂山寒雨裏策蹇一人歸臘月九日漫圃贈曹慕堂

云瓦礫楫柵半燒殘老圃撈寒對宰官慙愧草堂無綺

褥紫貂裘坐破蒲團松芝山館云蕭蕭窗紙透西風小

憇攤書斗室中疏影半簾斜日轉滿籬豆葉叫秋蟲學

士字德裕圖色里氏始祖穆組黑龍江地方人國初來

歸隸鑲紅旗父薩克薩哈原任協領朱石君所撰墓誌

謂學士姓佟氏題曰佟先生墓誌銘大誤卒之明年劉

湄爲梓其遺稟

湄字岸淮山東清平人已丑庶常由編修官至副都御史

玉閬峰自

熱河寄次伯氏讀裕軒集感賦原韻云鶯嶺別開青鹿

洞瀛洲難繫白雲身誰知泌水垂綸客曾是陳倉較獵

臣塞外煙霞詩最富田閒風月歲忘貧多情侍御傳遺  
稟日擊邊關景更真冶亭原詩惟清齋集未載

錢擇石題圖塞里學士野圃兩年懶不郭西游誰道開

亭更起樓指點釣魚臺廢圃

案釣魚臺在順天府懷柔縣西花園村相傳金王鬱

隱居于此

商量運酒舫新洲菱蘆江上回風偃擇筍吳鄉齋

景抽我亦有田歸未晚林端殊愛友聲求又圖塞里學

士野圃同程選部翁學使曹參議作又築平臺接小樓

天青目極便銷憂開河乍下諸山水殖穀齊登兩岸秋

蘚壁有題行且讀松醪能醉臥還酬轆轤汲井添方沼

難得蓮花已過頭朱竹均裕軒學士小園看荷阻雨不

赴釣魚臺畔逸仙房吾輩頻來甘下牀半畝傾樓銷寶  
氣一彈流水衣荷香深慙高鶴天游隱敢忘清蟬夕噪  
涼進履有期驚已後西山雨脚怨朝陽裕軒先生交際  
自覃谿慕堂博西齋陳伯思程魚門外有饋樊川祭酒  
園菘阮吾山見惠梅枝杖簡福欽文同年薊州道中雜  
記和良瑤圃尋李廉衣不遇河閒道懷哈度汪學士雨  
後懷德脊齋皆見集中樊川爲桐城張裕犖吾山爲山  
陽阮葵生欽文爲庶子福明安瑤圃爲宗室良成官至  
祭酒廉衣爲任邱李中簡官至侍讀學士度汪爲哈靖  
阿乙丑進士官侍講學士脊齋名德保

與定圃宗伯同名

壬戌

進士由編修官至侍講

石民太僕國柱爲笠民觀察介弟乙丑館選屢掌文衡  
楚闈卽事詩云廿年橐筆扈神京七度恩霑校士榮乾  
隆三十九年以侍讀學士任山西學政四月自關北入  
大澗口至嵐州試署作云決渠水作冰絃響捲幔山如  
畫冊橫句亦新脆可誦其哭馬協恭權使云孤兒背上  
肉老父關外骨骨歸肉已穿老母淚成血酸風卷地來  
行道亦悽絕忍貧還讀書夜夜照寒月協恭名寅著內  
府人其尊人以事戍遼左卒時協恭年才十五徒跣奔  
赴艱苦備嘗負骸歸葬養母以孝聞依姊夫禹恭學士



讀書成立爲人伉爽好義在官不避嫌怨由郎中歷蘇杭織造監權淮關至是卒于官石民慮其無傳故爲詩紀之

虛宥府尹博爾濟吉特氏有使蜀草夔州詩云魚水恩深際會奇永安遺命至今悲三分長抱中原恨兩表無慙地下知庭樹千年棲翡翠峽雲終古護采恩夕陽江上多殘壘想見揮戈教戰時其開封道中句云殷周朝會中原地漢楚戎車百戰場語亦該括

王惺齋宰福建將樂三月而罷三十年閒歷掌講席於閩則延平之道南仙游之金石邵武之樵川順昌之華

陽河南則衛輝之宗本山東則濟南之濼源蒿菴曹州  
之重華於其鄉則鎮海之鯤池所成就者甚眾長於推  
步前史月日參錯者均爲考定校勘韓集撰讀韓記疑  
十卷其符讀書城南一條云荀子云雖王公大人之子  
孫不能屬于禮義則歸之庶人雖庶人之子孫積文學  
正身行能屬于禮義則歸之卿相士大夫孔子論卿大  
夫士之孝以能保祿位守祭祀爲賢身不陷于不義身  
不離于令名皆孝經語公舉三公後之飢寒者示戒所  
謂立身行道揚名悉此保祿位守祭祀之一念基之後  
儒必欲絕去顯榮之念但以獨行己意奮身一擲爲能

此孔子所謂暴虎馮河之勇非古聖賢臨深履薄恐墜  
恐陷之義譏公者謂當開以性命之學性命之學孔子  
亦罕言之奈何責諸後生小子篇中勸以蓄畚經訓戒  
其身陷不義則固未嘗不以聖賢之學期之讀書不審  
其大義所歸喜于苛論前賢皆孔子所謂非求益者也  
示兒一條云詩言辛勤三十年以有此屋廬按公自貞  
元二年丙寅入京至元和十一年丙申爲中書舍人適  
三十年此詩欲令兒輩無忘往日辛勤必係初得此屋  
時作考異云上宰相書所謂行道憂世者此詩則已不  
復言矣其本心何如哉愚謂我冠講唐虞及考評道精

麤等句皆行道憂世之心所寓也公守道不屈之操至老彌堅至于歌詩聊取諷口悅耳其行道憂世之心者不必時形齒頰如必以辭而已矣則如持籌鑽核之徒但使口不言利卽當以廉士推之乎以此論人徒使巧於言者務爲矯辭欺世而坦夷之士反至無地自容孔子論士以行已有恥不辱君命爲上公早年不與劉柳爲羣晚歲一使淮西一使河北皆能樹功名以自見使遇孔子必不肯以第二等人相目因論朱子本心一語及此彌歎孔子之言乃萬世論人之極則也惺齋博極羣書工古文勤考證爲學以宋五子爲宗而持論平實

足破高而不切之膚見其在將樂平鹽價齟客心害其  
法以飛語被吏議乾隆丙午卒年七十三張鱸江記其  
治行甚詳

朱子頽送那兩蒼農部之瀋陽云先生學富囊無錢家  
四壁立常晏眠日高不得趨官府吟情卻共春風顛昨  
報先生遷戶曹先生不喜心忉忉敝裘恆苦春經雪疲  
馬還愁夜度遼君不見我輩相逢本寒士家無隔宿思  
經世故人一第命猶艱官至郎官豈卑位好壯行色向  
關東關門海勢相爭雄蓬萊夜見金銀氣邊塞朝吹朔  
漠風神州土厚民風美沃野屯田幾千里在官飽讀勸

農書莫苦清貧令人鄙閑情輒復事游宴冰鮮野鹿堪  
供饌吏人擊鼓快行尊詞客分牋爭染翰三年報最來  
相尋歸裝仍願無黃金重置故鄉一杯酒索看塞上清  
風吟雨蒼名那霖與何淵若徐崑山友善年輩略同至  
乾隆十五年始舉京兆有嘯月堂集七夕鍼樓曲云九  
天鸞駟下瑤宮一水盈盈上界通丹桂漸開瓊兔月白  
蘋初動鯉魚風年年歲月集靈配大人端策占歸妹紫  
鳳雲邊冷畫衣白榆樹下搖珠佩丹臺綺陌豔新秋爲  
感佳期望女牛雙星影入梧桐院半夜人棲翡翠樓高  
樓別院紛相向金谷銅街詎能讓畫棟千尋駐彩霓湘

簾十二飛銀浪玲瓏拂翠九華鐙旖旎流蘇百子帳六  
曲采恩影蔽虧一籠蘭麝紛飄蕩爲看今日五侯家堪  
羨今宵好物華千絲宛轉同心藕一樹葳蕤稱意花簇  
簇鮮衣潘縣果繇繇錦帶邵園瓜金鍼璀璨舒纖穎綵  
縷紛披耀綺霞明眸皓齒顏灼灼晚下中庭臨繡幙悠  
揚裙衩鳴兒新淡淡衣衫杏子薄寶釵鐫作碧蟾蜍雲  
鬢貼將金孔雀拾翠佳人本姓秦弄珠仙子來從洛娘  
娘婷婷絕可憐萬轉千迴瑋瑋筵欲託青衣傳祕語頻  
遮紈扇祝靈仙願賜好容顏濯濯如花秀梅萼深含漢  
殿香瓊枝嬌映陳宮瘦願秉巧杼機的的工組繡蘇氏

迴文顛倒成文君碎錦參差就願賜新歌舞婉媚翹長  
袖樊素清音遏楚雲飛瓊纖步穩春岫願俾好文章金  
石出芳漱書桐句美冶顏多詠雪才高芳齒幼夜如何  
其夜向闌銅壺聲徹玉龍寒參辰已沒蟲吟起沆瀣初  
生露氣溥別有幽閨傷歲暮秋風秋雨淒淒度綠窗蟋  
蟀枕邊音紅日薜蘿山下路楊柳曉殘入夜鴟珊瑚開  
老合歡樹佳節正如此幽懷那可訴年來年去恨迢迢  
爲歎仙家尙寂寥莫教天下羅紈淚灑向人間荳蔻梢  
學四傑體猶不失麗則遺音

嶧峨周立崖大理航吟嗜書刻有褚登善顏清臣及宋



四家帖陳未齋題所刻坡翁書清虛堂雪詩卷尾云坡  
公眼空恆河沙下視凡筆如蜂衙偶然對雪揮醉墨十  
指拂拂飛天花豪情奇氣兩鬱勃杜韓顏李同一家立  
厓侍御有古癖欲爲藝苑留瓊葩我嗜公書嘗苦學如  
飢思食渴飲茶梁園寒夜百展玩不覺漏鼓聞三搗臨  
池那無干挺墨惜哉老矣空吁嗟卽次坡詩韻也

梁文莊征衣云聞道長裾不利趨況隨行獵歷川塗短  
衣佩劍風猶在缺勝從軍制未殊已喜跨鞍輕矍鑠不  
憂舉步礙榛蕪書生鞭弭周旋處也製征袍與眾俱地  
竈云依山列幔隨疏密因地爲鑪各淺深穿穴不須陶

治埴拾薪端可漑烹鸞升煙遙結干廬白移壘空存萬  
竈黔漫說風餐兼露宿由來增減重韜鈴汪文端常山  
峪行宮蒙賜佛手柑恭紀云佳實曾陳玉座傍冰盃擎  
出沐恩光賜從紫塞風霜老貢自炎天道路長名美並  
標仙掌秀色深遙映御衣黃縹囊什襲歸裝穩留對秋  
光共晚香劉文定寫心精舍恭和聖製元韻云仙源勝  
處隔塵音曲磴懸梯迥出林金粟花香眞諦現玉池月  
印葆光沈能馴最是靈臺鹿解舞都爲闔苑禽當境拈  
參無盡藏仰憑天藻會天心三公皆文章進用久直內  
廷當時奏御之篇第取莊雅靡當箴獻而海寓承平八

方無事清詞麗句照耀蓬萊華蓋之間自古在昔讀之  
有那頌之思焉

烏雅穆丹字史雲號荔帷別號晚拙居士以辛未庶常  
改主事由工部郎中出守嘉定金川用兵嘗總西藏松  
岡糧運有西南于役草除夕云殘年逼美諾蠻地復陽  
春妖霧三旬埽山光八面新荒煙埋故壘凍雪暗幽燐  
入夜威槍發翻疑爆竹眞朱子穎立春日離席呈穆荔  
帷太守長揖賓筵踏翠微客行淹蹇壯心違漫憐善舞  
揄長袖猶喜征戎慣短衣荒驛風霜催我老春盤豆莢  
向人肥可堪馬上曹騰去萬里觚棱戀曉暉

翁覃谿視學粵東條記與學侶論詩語爲石洲詩話五卷又增評杜一卷附說遺山漁洋論詩絕句兩卷蔣礪堂爲開雕於兩粵節署其復初齋詩有可與詩話相證明者今撮錄卷中以備翁氏一家之說焉

太白酒樓云飲酒必攬勝萬量借酒收未知洛陽董何取津橋頭太白本仙才奇氣隘九州肝腸出錦繡嘯傲凌王侯一以酒發之江山相獻酬浩乎天地閒大海釀一漚元龍百尺上孫楚想同游蒼茫視萬古來者能繼不江河流日夜此意託悠悠竟莫覓詩髓而但執酒筭多少尋詩者鎗頭醉死休以此學太白何異劍鏃舟匡

山有書堂采石亦有樓不聞以酒名自足窮冥搜我願  
學詩客莫漫澆窮愁只合讓此老軒獨千秋手種碧  
桃枝氣接崑崙陬天縱一酒人詩於凡疇公聞應大

笑靈音下島洲酒星飛上天夜殘光芒留王太白浣筆

泉云吾觀太白才未易斗斗疑當其濡墨時雲霞生十

指寸管力萬鈞海涌羣峰峙測之涓者流僅此尺與咫

恐有星宿光直徹虛無底融結復上蒸墨花交筆髓千

載凝不散至今猶未已後來李涪輩山東說才子峨眉

天半雪格調徒爲爾近日託仙才中條有狂士亦及石

帆亭得聞麝提旨未知迦葉拈勺水喻奚似節錄題樂蓮

裳蓮隱圖云學杜者多學李少學力易造天難爭丑癸

書杜偶題詩後云自是精神畫不成非關意匠苦經營  
莫窺藩翰甯堂奧爰變丹青本玉瑩不可言傳猶拗怒  
竟如卓立未分明區區每下無高論尙見千秋作者情  
乙亥書杜遣興詩後二首云醜好奚先後君當翻覆看莫  
貪成實早方信及時難臘雪禾根暖春陰麥秀寒誰知  
空谷底香已蘊幽蘭明堂庀梁棟匠石索邱樊大厦果  
堪倚萬牛焉足論蕭寥稷契許寤寐孔姬言端爲松筠  
憶云何計本根丙友人爲摹太白少陵像於齋壁云何  
關飯顙意重題亦異峨岷軸並攜二鳥千秋煩省記三

才萬象孰端倪角弓嘉樹丹初誓瑤草青精米一稊稽

首焚香憐鈍滯儻分大藥乞刀圭

辰戌

宿德州作云我行

德水濱緬懷德水子結亭以杜名曰奉杜陵祀虔若事

父師自謙鈔胥爾其鈔世罕聞聞亦莫之喜益都香草

生知我役經此比年寓我書款門訪故紙獲歸置輿中

讀之風雪裏編香乖次第點竄失文理豈惟昧杜義蓋

未喻詩旨徵文又一編漁洋所稱是惜哉不得見躑躅

徒水涘嘗愛胥鈔名託意良有以涪翁大雅記早得杜

家髓盡埽箋詁釋乃見真子美近時仇朱輩掇拾益蕪

鄙誰識鸞鳳律一洗箏琶耳來者或未知往者咸在矣

吾見三十家得失具可指

方綱所見杜集注本三十餘種

嗚呼六經後

二雅同一軌借使宣聖見正等星宿掎欲仿授經圖請  
從豫章始下逮金元明所務源擇委達哉衛湜言言不  
必出己古人立之師質樸以爲紀吾聞吳若本精出宋  
時梓恐難一端執紛又千家起安得深校讐大書瑩若  
几竟用鈔書例屏絕羣言綺蘇施黃之任瓣香同受祉  
彼尙有言說而此空諸倚折衷詩之聖考鏡詩之史魯  
韓奚判齊興賦可通此此願蓄六年宿此彌深企歸摹  
浣花像旦旦薦蘋芷庶假夙夜勤以證後先揆萬川滙  
一條同歸大海水

巳亥



小峴司寇九月六日集同人補作漁洋生日云借問王

裴吟輞水何如韋柳接柴桑

戊辰

齋中與友論詩云賤子幼苦學韓門乏階梯同里兩朱

兄竹君石君鳳梧穎始菱聊假古錦笈氣吐長虹霓么弦不

孤張峻坂甯猛躋初非牧之序盡名李藩題後生不考

原李徑遂成蹊豈不鬥富豔仍思途渺迷洪川浩無梁

慎策羸糧齋

為近人嗜長吉而發

吳門金十郎香瓣稱三李臨川

有樂生或乃二李擬錦袍固天昇錦瑟豈霞綺翡翠盆

池戲甯喻龜鶴旨馳情凌紫煙奚止嚼瓊蕊奴僕命騷

歎艱哉加此理充實與節制憤悱誰發啟馮生較黎生

邛涉端江水養之以充實又養之以節制送樂蓮裳南

歸云近來摛藻輩唾拾長吉囊歸些命以理銓艾誰羸

糧匡廬非側橫真面對青蒼譜之葭琯飛奇律嘯歸昌

辛未

近人有仿張為主客圖取張司業賈長江以下五律成

集者賦此正之四首云五字論中晚誰將杜法參宗支

從渭北甲乙到樊南是有君形者甯從正味含罪言如

不朽綺語又何慙唐五言律詩繼少十子錢郎後誰升

李杜堂寓言原楚些古賦自班香濃薰班馬香謂上林

也力挽千鈞上神周萬象旁弦歌韶武接豈止律三唐

律句趨平弱人心學術關聲雖嚴黍尺氣可敵江山五  
字推敲處千秋祖述閒如何憑窘步騷雅欲追攀撚斷  
吟髭者牙弦叩軫徽沁心非僻苦放手乃精微長律申

之祕中圓穀者機借他評畫說打破作家圈

五七律同  
穀率也而

謂唐人撚髭句不屬七言可乎近日憚南田謂打不破  
畫家一字匾曰窮也此作主客圖者正坐一窘字庚午

朱蘭嵎臨龍眠畫東坡笠屐圖山陰朱蘭圃復爲摹幀

載題其後云先生本靜者嗜酒非天性詩中偶及酒皆

有託而詠卽以詩法論亦非以狂勝進取雖孤高所裁

乃雅正使遇聖刪詩韶武音放鄭先生必高第興觀羣

怨稱真放本精微內照天光定南郭知誰爲北門須善

聽節癸卯次答冶亭閩峰二學士論詩之作云虛閑堂開

晝不炎鞞鞞鄂不香透檐遲我談詩無雜客嘯巖坐上  
軒修髯我昨吟君對牀雨擬諸子由並子瞻眉山才名  
古所少彭城宦况報已廉豈如頭驢恰伯仲日以古學  
相鍼砭欲從蘇門杜法叩聊借迦葉天花拈世以蘇詩  
目奔放三藏法界標華嚴倒垂銀河注滄海變眩百怪  
包洪纖誰知常日得力語圓象表裏天人兼眞放精微  
非客慧豪釐妙算楮與縑詩與畫禪本一理機鋒電掣  
難爲添唐之天寶宋元祐堂堂筆陣千軍峴中閒微茫  
不傳處神工祕籥開樞鈴後來空同大復輩衣冠優孟

爭吞擣白蘇名齋意固躋王李七子波猶漸由宋窺唐  
覓津逮必於元陸資膏霑道園詣極不易到茶山白石  
稍未饜獨有遺山樵玉局往爲遜士芟歸潛中州萬古  
清粹氣燕趙慷慨吾何謙淵乎白山諸老集君家一尺  
哀于籤天挺光芒要善養不在虛騁豪鋒銛今日源流  
溯坡老何啻甘苦追江淹小齋日日拜蘇像更擬臘雪  
佳辰占邀同一髯兩學士泚豪對捲松窗簾丙午題坡公  
眞像軸後云書格僧虔兼子敬詩懷白傅接陶公甲子讀  
蘇詩四首云蘇齋讀蘇詩迴復萬古心嗟此邁往途敢  
以薄力任法自吾儒家杜陵揆心箴眞氣眞性情均鍾

調瑟琴洞庭九奏響勃發於謳吟庶惟杜韓後山海量  
崇深非由讀杜出誕岸誰追尋所以星宿源憑杜爲指  
針詩源浩無津每借仙與佛杜求洞宮丹亦向雙峰剎  
眞詮帆欲追遠壑軻初發是有拈寄處奚關智巧竭八  
萬四千偈如何問禪窟身在匡廬中山淨谿長舌百千  
泛潁相照徹鬚眉髮續之無盡鐙合什妙圓月誰知澹  
忘言胎息本無訣先生初不飲言飲蓋其偶後來縱筆  
爲詩必系以酒對客喧壺觴自名豈升斗眞一特假辭  
和陶亦何有昔聖酒無量曾涉詩教否太白酒中仙彼  
自出塵垢一以瓣香參何必持螯手相與觀其深慎之

論尙文蘇陸較香山似近實不同蘇則函眾有又不侔  
放翁無如李何輩僞體欺盲聾翻借蘇爲藥欲效針砭  
功誰將珠玉韞誤等薑桂充嗤爾白蘇齋偏嗜非由衷  
渾淪元氣出廣大教化中試以白集擬然否杜法通且  
漫杭湖上柳隄飛玉虹甲由蘇入杜之義屢見於詩如  
千里金張叩笈津一源蘇杜孰推論杜惟質厚元無訣  
蘇取雄奇恐不真又云於蘇窺杜法詩境乃升堂蘇門  
問杜法圭景苦卓立數四言之

讀王逢原廣陵集呈石君前輩云因君一聽彈廣陵兒  
時氣味來秋鐙碧海鯨魚掣不得虛空驟馱跨或能君

時浮雲奮馳籥我亦前輩隨飛騰邇來芟翳步就坦時  
復聳立中含稜奇哉嘉祐詩廿卷譬如華隼凌千層韓  
豪頗帶孟郊苦匠石誰識臨川稱臨川崛起濟川會慨  
然舟楫謂可勝瑚連階墀非褻翫榭榭梁楠方時乘欲  
尋微言相感發豈止傑句供鈔謄山陂江渚送目處碧  
天斷靄追秋鷹萬古奇氣要收拾六經根柢同伏膺所  
以雁湖慨知已切磨之義常兢兢韓孟逕途豈止此同  
學漫擬王與曾萬丈光芒定何物妙喻試叩鍾山僧乙  
校黃詩有述云碑兀精神只自傳何曾一字耐言詮李  
洪編校甯尋得任史拈來亦偶然退聽當前人問法皖



公洞口石參禪請聽韶武弦歌合孰是南華內外篇不

信西江有派圖繼公詩獨道園虞詞章一變名初祖理

學真傳出大儒萬古乾坤清粹氣此中言語後來無區

區採摘螢編譜比刻分甯刻本殊乙未六月十二日山谷

先生生日拜像賦詩用乙未題正集韻云蓋以真實義

超出像物先質厚爲之本萬派洞一淵風騷萬萬古力

挽大海旋節丁未校黃詩重有述云紫氣風迴大海瀾誰

知古井不生湍障川浩浩俱東注返景時時得內觀絕

利一源憑戰勝默存萬象入寬安龐公吸處尋初祖正

白閑中著力難新津妙悟本拈花薈室燈光自世家笛

鶴幾年參玉局石羊他日叱金華  
九成鼎轉丹留火三折江紋篆印沙  
昨剔擘窠書偈子一峰廬阜倚殘霞

丁未

校茶山集四首云前有陵陽後劍南  
中間句法許誰參已將北望神州意  
收拾傳燈老一菴居仁圖譜江西社  
遠自元和學楚騷玉柱蝟蟬非異味  
釀來清絕本滔滔談禪談石復談茶  
山寺孤清自一家故里誠齋堪配否  
贛江翠竹渺雲沙得髓機關不可傳  
松風鶴夢故翛然後來學杜諸君子  
跬步臨摹絕可憐

乙未

仲冬自南昌按試吉安南贛諸郡登舟有述云是日桂林友寄我米陸題莆陽好菴記詩境我所棲米書燭虹

月陸句剽象犀獨其品詩語自謂道勝躋想當寤巢鳳

警覺切鳴雞舟楫鞍馬閒問津庶不迷

慶元丁巳正月放翁與桂林友

人論詩書云大抵此業在道勝則愈工舟楫鞍馬閒加意勿輟絕塵邁往之作必得之此時為多按放翁是年

七十三歲正月二日雞初鳴夢至一山寺名鳳山其尤勝處曰味軒為賦詩既覺不遺一字

丁未讀劍

南集四首云苦心欲挽古風還神往幽風七月閒一騁

蕭尤楊並駕誰知衣鉢在茶山杜老憂時白傅閒誰云

禹稷異於顏一杯擬酌長吟處千載蘭亭曲水灣絕塵

邁往本天機躍馬梁州試鐵衣正自箇中爭得力桂林

片石悟精微

見放翁與杜敬叔手帖

自鄙如何例玉谿

放翁詩溫李真自鄙

三才萬象識端倪玉臺格韻西崑體只對坡公偶價低

丙辰臨放翁手牘贈青儕云放翁此札吾所師飲食寤寐  
恆以之靜光時時發泰宇何用鞍馬舟車時道途光陰  
易飄忽身如蓬轉心如馳萬景奔來縱卽逝後來補寫  
悔已遲此腕一揮可尋丈此際巧算爭豪釐雲煙莽蒼  
變風雨江海起立騰蛟螭收之跼息觀定力是有天造  
非人爲放翁舉似杜敬叔敬叔桂嶺旌麾持慶元三年  
歲丁巳先生歸老蘭渚湄其春夢到鳳山頂坐見日月  
浮天池先生才思晚益壯夜臥鏡物如晨曦南鄭鐵衣  
有何戀松軒僧壁爲相期

杜敬叔僧舍松下  
之居名曰虛懶軒

當年晨夕

對牀語文外有事非關詩先生自言去騷遠放筆奇氣

逾淋漓然猶短歌未發洩

放翁萬首詩中無一長篇七言古詩

蘇黃而後

當俟誰下略

讀元遺山詩四首云秀骨本天然非可學而至驚心動

魄語抑豈堪屢試今人惑津梁惟思騁奇異又怯昌谷

囊難憑儉腹致輒覺陸坦迤不及元雄恣猶如學坡詩

莫喻其深祕城東一矮榻二楊同啟筭

乾隆己巳庚午間日與立山衛

圃誦遺山集

光陰掣電過六十年前事夢迴橋南窗憬焉發

深愧淵明飲之逸太白飲之仙坡則欲兼之仙佛俱有

焉以我讀坡詩竊疑未必然放翁之飲酒半壁澆江山

各有沈摯處敢誰輕與軒遺山真嗜飲何處窺其源恂

悅莫能名亦擬索真詮記與擇石語擇石笑不言飲中  
較之蘇離合夫誰宣僅以飲酒論何礙詩足傳遺山接  
眉山浩乎海波翻效忠蘇門後此意豈易言爾日讀坡  
詩胸有節制存元精貫當中耿耿誰與論我觀寶書品  
於褚斥籬藩蕭阮羊薄上遂擬探本根未審防撓漓如  
何追胚渾望古俯眾流興定之初元令人緬星漢峻極  
窮崑崙儻以貫坡翁孰竟委與源秦黽諸君子恐未參  
妙門金翅擘滄溟金針度鴛繡何人望見之渺不露結  
搆斂之入豪芒縱之恢宇宙軒軒非濤瀾錯采豈雕鏤  
所擬長沙帖抑非閣本舊又不以翻新本自仵興就象

罔於元珠憑何超喫詬此祕非傲人正復難輕授精純  
義山眞故在鄭箋右

甲戌

光緒壬辰夏游海王邨得覃谿所選五言多師集八卷  
五言餘師集四五兩卷七言餘師集六七兩卷多師集  
視南海伍氏所刻小石帆亭五言詩續鈔有出入餘師  
集則伍氏未之見也審其年月爲在粵時鈔錄未定之  
藁伍本於李杜登選稍隘不如此本爲備伍本歐陽文  
忠多二首放翁至三十七首山谷多八首又有陳簡齋  
一首姜白石一首安汝止一首元遺山七首皆此本所  
無伍本首卷初唐及王孟四家之作此本亦未有冊首

題云北征奉先必要而鳳翔之李氏園可不要又云竟  
要專鈔五言妙篇上接漢魏六朝又云如杜晚登灤上  
堂之類山谷子由自續谿還之類通爲一編略分卷次  
又云此事任憑講法講巧總以會做爲能事但日讀摩  
詰少陵日看東坡自無不會做之理矣戊戌八月廿二  
日鐙下五言餘師集下注外集字七言餘師集有初白  
甘泉漢瓦歌附錄漁洋竹垞之作謂三先生各有其極  
至處而朱尤做得出又有戊子二月八日由連州回省  
舟次大通濬書評識數行己亥三月復於隆福寺書攤  
得七言三四五三卷謂漁洋收拾整頓之功實足以開



啟後人謂宋荔裳棧道平歌此當時最有名之作亦只如此雨露風雷翻風土鼓豐功經濟太似應酬後半浮鬆而乾竭亦似應酬謂竹垞贈鄭篋是竹垞七古最好者學古人而不露痕迹可謂能事矣坤一極賞營邱柏之作後半閒話太多終是不必不及杏花新燕之作先生勤懇細密有功古人固並世所未有也

平原董元度字寄廬號曲江默菴總憲訥之孫少日以春柳詩擅場年四十餘始通籍由庶常出宰江西改東昌教授秉郡鐸者十年老疾自謝去主保定蓮池書院有舊雨堂集趙鹿泉爲其壬申同年稱其口吃而心達

貌儉而神王境嗇而道豐出其詩讀之儻然自寫其生平之蘊結有得于南北閱歷之多而神仙令僕未足加吾素也舟行雜詩云漁莊蟹舍接芟蒲浩渺煙波夜月孤一棹檣鐙數聲艣輕舟已過獨山湖新城益都皆其辦香所在盧雅雨輯山左詩曲江與宋弼蒙泉實董其役一自治春文讌後代興畢竟屬齊州題雅雨平山高會圖句也

蕪湖鐵工湯鵬能揉鐵作畫朱竹君詩所謂近來剛要柔能化別樣枝頭壁上春也凡花竹蟲鳥山水屏幃曲盡生致其巨幅必積歲月始成世不多見者皆徑尺

小景好事者爭購之範以木懸諸壁間或合四面以成一  
一鐙亦名鐵鐙每幅輒直數金且不易得湯旣歿他工  
閒仿爲之終不能逮蓋鑪錘之巧前後所無也梁元頴  
朱朗齋及王審淵觀察邵蔚田侍讀均有詩紀之同時  
諸葛永年名祚能鑄銅章煉銅鍊鋼皆自爲之亦蕪湖  
人陸宇東爲作諸葛銅章歌

嘉善謝軒鑄孝廉爲東墅侍郎子有松聲茶小熟花影  
蜨雙飛之句其婦翁王秋汀愛之軒鑄年未三十卒于  
家秋汀屬仁和沈莘田寫此詩意莘田系以絕句云松  
枝落盡松根老半顆茶煙石乳香我欲東山尋屐齒那

堪零落謝家郎莘田名清任官至川東道守潼川時葺  
草堂書院奉少陵木主以時弦肄重過娘子嶺云木葉  
脫將盡殘秋又早冬三年思遠戍匹馬立危峰老衲清  
茶供征夫玉粒春明春兵事息民氣定從容時值金川  
用兵也

阿襄壯字補堂鈕祜祿氏宏毅公額亦都曾孫乾隆二  
十二年襲果毅公二十九年以戶部尚書協辦大學士  
回部之役以五百兵敗賊萬眾征緬之役授參贊大臣  
往雲南軍營署雲貴總督尋授副將軍駐永昌三十四  
年十月渡金沙江上游之戛鳩江抵蠻莫由蠻莫江出

金沙江經略傅文忠偕阿文成領兵營東岸襄壯據西  
岸水戰獲勝襄壯病創久登舟益劇次猛拱夜有大星  
隕于西方十一月卒于舟次是夕雷雨距受降僅數日  
耳王德甫時緣事罷官從軍來滇爲輓詩云上公威望  
壓朱波近領樓船已病疴温嶠登舟心尙壯文淵鑿室  
病難瘥三號何處從升屋五夜空聞喚渡河除道梁嗟  
人不覺冬雷聲激怒濤多昨傳星象隕瑤樞北落光芒  
定有無共悼背瘡亡卞壺最憐視含有荀吳上方祕器  
君恩遠下水危橋士氣孤此地年來多戰鬼雲旗時往  
眾靈趨時公子豐昇額亦在軍次三十七年以領侍衛

丙大臣赴金川軍營平遜爾克宗特於公號果毅二字  
上加繼勇二字四十二年卒諡誠武

乾隆書家崇如元穎禹卿而外如孔東山周稚圭顧晴  
沙均以工書名三十五年甘肅大旱晴沙時守平涼救  
蓄勸分頗著聲績嘗口占詩句云輪蹄鳥道羊腸路溝  
壑鳩形鵠面人青嵐山詩云產破妻孥賤腸枯草木甘  
書法出入蘭亭聖教間金川木果木之變文臣殉難者  
二十六人時署四川按察使度地于少陵草堂之西建  
慰忠祠屬王德甫撰碑記而自書之以鐫于石其渠江  
絕句云輓輿輕夢宕渠邊林鳥頻呼上渡船綠到鴨頭

春水足嫩晴風色薄雲天天妙閣云濯錦江空還似練  
大峩山遠只如眉天邊風露無聲處獨立西南月上時  
風致可想見之

山右聞人說巖蓮洋世所共識名臣如陽城田克五丞  
甯于北溟興縣孫錫公循吏如陽城衛立鼎綏德馬如  
龍儒學如洪洞范滂西介休梁確軒晉水清流後先輝  
映乾隆閒則代州馮均弼廉使廷丞汾陽曹慕堂宗丞  
學閔名德爲朝著一時之冠慕堂長朱笥河十年庚寅  
笥河典試八閩歸途有懷京華消寒小集諸公其寄慕  
堂給諫云宣武門西涼月彎遙知白髮幾酖顏世情多

閱恆稱退古意能留易得閑美酒何妨呼後進勝游略  
不負名山浴沂風舞諸公志特地停舟雪水閒寄均弼  
比部云思君宛若卷舒雲軋軋難治意緒紛幾獄平反  
小司寇諸經貫串大馮君貧何妨甚休令病醉不須沈  
聊復醺何日清剛相晤語消除柔臆大江濱遠道相思  
極爲推重均弼歿後朱石君誌其墓汪容甫爲撰神道  
碑墓堂則石君辛楣蘇齋均爲之表彰

吳杉亭由中書出爲山西同知工句股旁要之學著有  
周髀算經圖注沈學子爲之序其效香籤句云綵線閒  
拋貪鬥草繡簾不捲爲熏香與商蒼雨鬢影憶簪花第



一眉痕怕見月初三略相似蒼雨卽寶意近人作名人  
年譜乃誤仞爲兩人何荒陋乃爾

翁覃谿序西齋雜著云西齋洗馬所著偶得三卷鳳城  
瑣錄一卷西齋姓博爾濟吉特氏祖邵穆布總督兩江  
少承家世舊聞加以博學多識精思彊記其於經史詩  
文書畫藝術馬步射繙譯國書源流以及蒙古唐古忒  
諸字母無不貫串嫻習與子生同里乾隆丁卯同舉鄉  
試壬申同中會試同出桐城張樹彤先生之門又同選  
庶常同授編修同直起居注同修續文獻通考同教習  
癸未科庶吉士同官春坊中允其後予視學粵東西齋

觀察粵西子寄詩有十同篇之詠西齋之卒予適出使  
江西以所著此二篇於疾革時託同里邵楚帆給諫憶  
嘗同在館下十餘年間讌談諧笑若筆之於冊皆典故  
也而今僅於此二種系之西齋外任雲南迤西道內官  
兵部郎中而其在詞垣最久故仍稱西齋洗馬以志感  
舊之思此橐在楚帆篋十餘年楚帆嘗與西齋同官兵  
曹每惓念故交必舉此編以計日付劄爲快今白山心  
齋給諫與楚帆同直兩使南漕將俶裝亟以表章婦翁  
遺藁爲先務并識以傳之心齋郭佳氏名廣泰鶴舫相  
國尊人也嘉慶辛酉刻於廣陵節署復取西齋詩輯遺

梓而行之詩皆補外以後之作錢擇石有宏仁寺及觀  
荷各詩均西齋官中允時同作者原詩皆散佚翁覃谿  
題詩二首云藝苑蜚聲四十年淒涼賸草拾南天玉河  
橋水柯亭綠多少瓊瑤未得傳香濃雪近愴人琴給事  
頻年感舊心留得梅菴詩話在淮南煙月訊知音

西齋輿人言序云粵地萬山懸焉一逕蛇行於中不惟  
無車更無騎赤足輿夫蹶於石罅水涯時聞其呼號此  
不第勞者之歌也作輿人言八章其一云走走復走走  
長亭與短亭十里五里迤邐行速速更速速茅亭接茅  
屋倚竿且噉兩錢粥其二云過小橋橋小時防蹶怪石

怒攢劍直突陰流下有蛟蛇窟石齧血流足見骨其三  
云左靠右靠左空右空予戰慄前卻東龍陰風灑灑  
霧雨濛濛偃僂肩臂其曲如弓其四云上連臺臺高努  
力上復上一級一尺百級十丈痛徹於心兩腳掌輿中  
之人坐而仰其五云上坡路奔向前下坡路拽在後前  
支足後曲手泥在身汗覆首一筒米二鍾酒俟歸來養  
我母其六云泥水石頭路仔細好著步泥滑水深奈若  
何且聽鷓鴣滿山多行不得也哥哥其七云且歇誰敢  
歇官有緊事清晨發張髯瞋目十走卒行行若遲便打  
咄其八云平陽路且十里左有修竹右芳芷青如毯坡

平似紙嗟嗟與人且莫喜萬仞之山面前起此典郡柳  
州時作也郡縣勞人之職公事刺促不遑甯處有不能  
爲性命緩須臾者豈第爲與人言哉西齋於乾隆丙子  
主廣東試戊寅充日講起居注官者七年萬里投荒迴  
旋於子厚種柳升菴簷花之地者七載又復爲郎白首  
于役陪都嘗以丙午九日游萬柳塘坐客有惜其衰辱  
而作不平之鳴者西齋賦詩有云懷殘鼠璞何容惜難  
擾龍狂未肯降莫負清秋好節序倚欄且覆酒瓢雙其  
天機蕭散初不以世緣相縛也

西齋偶得論義山詩云碧城三首不惟朱竹垞之辨甚

確末首直出武皇內傳卽作者亦恐人誤仞而明言之  
必曲爲公主入道之說則所謂人間不知者何事詩人  
何爲而鄭重言之乎今爲逐句箋之然後義山之意可  
見貴妃以女道士入宮故三首皆作仙家語第一首首  
聯以仙山比宮禁三句言選入四句言進宮三聯星沈  
雨過蓋指武惠妃歿後而阿環乃專承恩倖末聯以趙  
家姊妹餽遺之物寄言武惠若未歿猶得交相妒寵或  
不致佚樂而受禍詩人忠厚之旨也二首乃指入宮時  
事對影聞聲人言妃之美也玉池蓮葉竹垞謂妃以處  
子入宮蕭史者壽王洪厓指帝皆以仙人喻之也或曰

洪厓謂祿山者非蓋唐人詠妃事多言其入宮怙寵未有斥及阿莽者紫鳳一聯驕縱已極鄂君悵望亦謂壽王焚香獨自眠卽辭王沈醉壽王醒之意有謂此言妃歿後帝思妃非是蓋三首始言妃之死也七夕相逢溯入宮之日簾幙至今垂人不見矣桂輪生魄喻月缺珊瑚無枝喻花殘神方駐景隱鴻都客事鳳紙相思卽長恨歌意唐人無不以秋風客擬南內人作者已顯言之更何必出己意以爲曲說哉其說詩可謂融洽分明西齋鳳城瑣錄自序謂強圉作噩之春仲抵任詢訪故蹟浸錄成帙朝鮮貢員時相過訪並問其國中典故亦

閒有所得集其語附焉時爲乾隆丁酉蓋自迤西道降  
兵部員外以權事至鳳城時所著也鳳皇城邊柵在盛  
京城巽隅四百五十八里邊門在鳳皇城東南三十里  
爲通朝鮮之孔道權使權民屢以居葑屋柴門終日靜  
坐國家嘉惠遠人凡鮮人之物豪無收取所抽乃邊門  
商民之互市者馬市之兵丁台站門柵人等所易牛馬  
農器亦納稅焉奉天南濱大海金復蓋與登萊對岸故  
各屬皆爲山東人所據鳳皇城乃極邊而山陬水涯草  
屋數閒荒田數畝問之無非齊人其記朝鮮軼事云明  
神宗時倭覆朝鮮有伎女忿恨欲刺倭酋爲所殺女名



玉梅塚在平安道往來人題詠甚多此亦可與聞見錄  
所載之瓊枝曼仙比烈矣

西齋雅善繪事有題自畫燈屏絕句八首云別館春深

擁麗華十分香透綠窗紗黃裳紫袖宮妝樣不在姚家

在魏家牡丹小室熏鑪徹夜燃竹牀紙帳自酣眠起來覓

取宣窰鉢自合春冰種水仙水粒粒含來火齊珠南薰

風裏露丹膚羞他閒色稱紅紫寫出堂前百子圖木榴旗

檀清馥散輕蘋素質亭亭野水濱底事辨才參舌觀李

家仙客是前身青蓮花陰得濃陰透綺疏一庭秋雨晚風

徐官衙坐對無餘事烏帽輕衫著道書芭蕉一院秋容碩

果垂好香偏傍晚風歛厥包原屬天家貢豈獨楓亭重

荔支

柚

皺瘦當年漫道奇渾然太璞足貞姿更煩藉取

昆吾鐵刻作人閒碧落碑

青璞石

雪後園林偏照眼水邊

籬落更生妍於今識得真仙貌莫把朱顏擬杜鵑

紅梅

桐城方世舉扶南著有漢書辯注世說攷異蘭叢詩話

家塾恆言其昌黎詩編年箋注十二卷乾隆戊寅盧雅

兩爲之刊行扶南自序云唐詩之有可箋注者莫如杜

韓二家杜有千家注韓有五百家注皆宋人所裒集韓

五百家注自朱子考異出而遂廢考異之後又有不著

姓名者宗朱子而廣之明季東吳徐氏刊以行世世稱

東雅堂本明人蔣處士之翹近時顧庶常嗣立繼有增  
注辨注者多而箋事者少韓詩本有年月可尋編者壻  
李漢又公門人必得公次第本意其中間有小舛亦或  
公隨手所錄如杜過張隱居二首一七律一五律語氣  
分明兩時杜彙之而張仍之李漢編韓亦或此例然有  
詩在後而編在前讀之易知者如元和聖德詩在元和  
二年而今以壓卷蓋題目重大時事又注明詩中無庸  
箋而年可考今變而移置元和二年以順編年之例易  
易耳其有年未明編遂誤箋說者如南山有高樹行贈  
李宗閔乃憫其謫出遠州以規諷擠之者事在穆宗長

慶之初時宗閔有令名無敗行韓公素與交好又嘗同  
爲裴度幕官故有此詩詩之結語不平可見今箋者以  
爲刺之蓋因文宗三年宗閔爲相黨局始興七年復相  
穢跡大著君子不黨詩必刺之而不考韓公歿於長慶  
四年其時相去甚遠阻隔敬宗一朝何由而預知其非  
早爲譏刺之詩乎此大謬也又有年已明編猶誤箋注  
者如效玉川子月蝕詩盧開手便書元和庚寅韓詩亦  
書新天子卽位五年是爲王承宗不庭之時時從裴度  
言用兵詔四面行營討之諸將畏怯逗遛不前以故詩  
中以東西南北星文比而刺之箋者不審明書之五年

爲承宗時乃以元和十二年暴崩于中官之手當之又  
大謬也今一一考諸史證諸集參諸旁見側出之書以  
詳其時以箋其事以辨諸家之說雅雨稱其詳考事實  
俾讀者如與籍湜輩親登其堂眞昌黎之功臣也

高密李愚村侍御以康熙癸巳進士入翰林雍正七年  
改御史時

世宗孜孜求治尤務通達下情開言路勅下御史臺謂  
侍御近臣朝廷耳目所司事關機要許非時密摺奏聞  
愚村疏劾用事諸大臣不之罪也有四子長憲高字荆  
南以進士官山西潞安同知再知澤州次憲噩字懷民

以字行所居有十桐樹因以爲號與弟憲嵩蓮塘憲喬少鶴相師友幼卽喜爲詩每得一家詩與兩弟效之輒似嘗曰唐律法備於中晚所謂格律也學律而不入格唐音邈矣故尤自喜其五律與少鶴依張爲主客圖例蒐集元和以後諸家五言律詩辨其體格奉張籍賈島爲主而朱慶餘李洞以下客焉名曰重訂中晚唐人主客圖學者遵奉之因取先生與少鶴所爲效張賈者附其後曰二客吟所居待鴻村在膠水西涯有沙水樹石之觀側近知名士時相過從與縱游海上諸山流連唱酬詩日以富少鶴爲岑谿令一游嶺南嘗謂同里單銘

廉夫曰吾詩自岑江集後稍能自立天姿敏妙多雜藝  
歌曲鏡聲之屬皆究其理致晚年尤好作畫得意者輒  
自題詠曰吾畫不能悅人如吾詩矣乾隆癸丑卒廉夫  
序其詩謂其措辭恬雅不事藻績其蕭然閒放之趣有  
非他人才力所能彷彿者當虞山漁洋主盟之後獨能  
奮袂其閒聲氣門戶之說一舉而空之雖其說未能大  
行於天下而十數年閒清才之士亦有聞而信之者其  
岑江集再泊戎墟句云誰知我名姓空習此江山姓字  
自在天壤也

石桐贈單書田先生云朝日照窮巷寒鴉叫枯桑破宇

斷煙火唯見屋上霜叩戶似無人剝啄驚空堂古貌稍  
難近初接方迴遑室中無一物四壁生清光敗絮亂不  
整點綴在衣裳身窘道益泰吐氣固能揚時時金石句  
縱橫出飢腸我對交敬愧大論何堅強側聞室人語呢  
呢多怨傷顧此男女憂焉知狷與狂丈夫率有志良爲  
此輩戕卓哉陶元亮前修邈難量冰襟雪抱能寫出高  
士風流氣格亦復岸異其訂中晚唐詩人主客圖旣成  
悵然有感題卷末二首云古來耽此道清味本酸寒思  
入如中病吟成勝拜官物生皆不隱情動卽教看未識  
成何用憑將鬢髮殘前生應有罪天譴作詩人但見無



雙士常膺不次貧青山窮道路白首役精神獨爲求知  
已淹留萬古身大類長江之苦吟要其集中諸作皆通  
體雅令非但得一聯稱意便怱怱不暇草書者比冬暮  
村居雜詠寄叔白七首云寂寞應甘分清冷味若何四  
時欲行盡一歲又閒過夜雪曉方覺朔風晴更多尋常  
閉戶坐抱鄰自吟哦翳翳荒煙合村家近晚餐犬偃日  
陽短鳥啄木聲乾暗牖寂已暝茅檐低正寒閒愁方歲  
晏觸次亦無端暄時此亦靜寒月更須閒野客雪中去  
村僮城裏還新書借未讀舊句定猶刪聊復倚藤杖門  
前看暮山貧後依荒塢憂來行近園雀爭牆外樹牛入

路旁村日落晝風止煙寒冬嶺昏樵人歸又晚深巷叩  
柴門盥漱臨堂戶清霜日氣澄鑪灰留夜火硯水結晨  
冰事少常如客情多始羨僧疏慵生自憎何處著人稱  
茅堂耽夜坐布被戀朝眠詩句還隨歷身名不稱年森  
沈殘臘日錯莫早陰天只對陶公集閒哦飲酒篇孤吟  
知與遠閒坐亦深更童睡呼不醒鐙昏挑正明夜寒如  
有悟鐘盡卽無聲曉寄城中客還能識此情姚合武功  
縣中作三十首較此當覺後生可畏蘇齋論詩不尙此  
種自是導人以康莊而此種會心愜志與從事於聲光  
氣燄相率而爲僞者固有閒矣

石桐灘縣訪韓公復云陶令移居處城南住幾家荒村  
隔谿問茅棟曉林遮對酒心還壯論詩日又斜不愁回  
路晚明月成樓縣公復名夢周號理堂乾隆丁丑進士  
官知縣有理堂文集居灘縣城南鍊牙渡

意園祭酒論詩絕句有云駢體文章足千古本朝誰可  
抗顏行只憐詩學積唐甚我願公無後世名謂袁簡齋  
也然簡齋七律亦自有不磨滅者如周瑜墓云天生一  
將定三分才貌遭逢總出羣大母早能知國士小喬何  
幸嫁夫君能拋戎馬聽歌曲未許蛟龍得雨雲千載墓  
門松柏冷東風猶自識將軍武后乾陵云高卷珠簾二

十年女人星煥紫微天明堂黜配無光武本紀開端有  
史遷鶴監儘容才子住南牙不放阿師顛蓮花霜折宮  
牀冷猶見金輪盪晚煙汾陽王故里云甲第曾將永巷  
收千年華屋感山邱功名遠埽蕭曹局歌舞長消蠡種  
愁一代侯王供僕役半房兒女任啁啾我來難覓親仁  
里暮雨蕭蕭過華州牛口谷弔竇夏王云一旅中原振  
鼓鞏夏王仁義偃王齊空爭孤注黃河北不解連環太  
華西牛口谷深天意在虎牢關失陣雲低英雄回首書  
生計夜夜青山杜宇嘯到桐柏宮觀夷齊石像云雙雕  
石像古鬚眉傳說宣和建此祠門外清流千百曲庭前

孤竹兩三枝也知讓國全無怨未必登山果有詩不敢  
蘋蘩向公獻恐應記得采薇時柳子厚祠云金章紫綬  
照江濱王者衣冠古逐臣但說權門難託足誰知文士  
易成神宮廷慷慨伊周業湘水淒涼屈賈身剩有荔丹  
成一曲至今歌徧楚南人措詞遣事非不學者所能效  
顰其再題賈太傅祠云一別先生五十年洛陽年少也  
華顛自憐枉受吳公薦白首重來意惘然蓋不能忘情  
於鴻詞之不遇也簡齋舉鴻博爲金震方中丞所力薦  
已未朝考爲尹文端力爭得與館選皆吾鄉人吾鄉老  
輩憐才好士不減南人豈皆如徐桐剛毅拒人於千里

